



册府元龜

卷之七十三  
至五



13
849
27





849  
27



册府元龜

淮南李嗣京參閱

西極文翔鳳訂正

豫章黃國琦較釋

帝王部 七十三

命相第三

唐肅宗至德元年七月卽位於靈武以御史中丞裴

冕爲中書侍郎同平章事

二年正月以憲部尚書李麟同平章事

二月以前憲部尚書致仕苗晉卿爲左相

晉卿天寶末爲憲部

册府元龜 帝王部



尚書屬祿山叛逆楊國忠以晉卿有時望出為陝州刺史晉卿辭疾不行因而致仕及朝廷失守衣冠流離道路多為逆黨所脅自陳希烈張均已下數十人盡赴雒陽晉卿潛逃山谷南投金州會肅宗至鳳翔拜為左相國務悉以咨之

五月以諫議大夫張鎬為中書侍郎平章事

十一月以左相苗晉卿為中書侍郎平章事

十二月制曰尚書左僕射兼武部尚書平章事子儀

才光三傑功格十臣克焯皇威載昌大業可司徒兼

尚書左僕射司徒兼戶部尚書平章事光弼全德挺

生英材間出于城禦侮坐甲安邊可司空兼兵部尚

書並平章事如故

乾元元年五月以太嘗少卿知禮儀事王璵為中書

侍郎平章事

二年三月甲午制曰出納絲綸是稱喉舌調和鼎鼐

必在鹽梅况艱難之際擇賢必資於選眾密勿之地

論道固期於得人兵部侍郎呂諲間氣挺生宏才迥

發訥言敏行強識博聞謀猷出三傑之先德業處五

人之上久在朝列尤推審慎復得鈞璜之慶宜膺補

袞之求可同平章事

乙未又制曰出納帝命經綸王言兆若見於非熊位

必登於仲虺行御史大夫兼京兆尹李峴朝廷碩德



宗室蓋臣中書舍人兼禮部侍郎李揆文房學府命  
代挺生行戶部侍郎兼御史中丞第五琦武庫智囊  
應期間出皆中和秀氣維嶽降靈可以宣暢謀猷闡  
宏體要庶得道光風力名重伊臯俱當入夢之辰其  
舉從繩之直旣用立法宜其弼予峴可行吏部尚書  
揆可中書侍郎琦可戶部侍郎竝平章事

上元元年五月制曰宰輔之重陶鎔所寄用諧時望  
必藉素名是以殷登左相伊尹成乎一德漢命舊臣  
孔光由其再起蓋以上扶皇極下庇蒼旻永懷寅亮  
之美實屬股肱之任特進守太子太傅上柱國韓國

公苗晉卿衣冠宿望廊廟公才體文雅之宏量負經  
通之遠識累踐臺閣久彰名器自艱難之際協贊有  
勞早契風雲之期備陳康濟之術頃以疲病固辭樞  
務重違誠懇之志爰假優崇之秩雖訐謀暫聞而夢  
寐無忘今戎事猶虞蒸人未乂漢將且聞於辭第留  
侯豈遂於停食成余社稷之本懿爾勲庸之望固可  
勉行新綬載弭舊貂宜罷輜車之禮俾膺黃閣之政  
可行侍中

二年二月制曰弼予之選審象是求天步未平廟謨  
尤切必資明表佇以佐時畫一之材取則不遠正議



大夫前河中尹徐國公賜紫金魚袋蕭華公輔成名承家繼業詞標麗則德蘊謨明道開雲霧之光節貫巖凝之序早登臺閣多識舊章再履宮坊先知至行致君望美闕相求能且推伊陟之賢更啓漢臣之閣還依日月佐理陰陽俾參政於紫宸用建中於黃極可中書侍郎平章事集賢殿崇文館大學士兼修國史

四月制曰致君惟善輔德在和必俟三台之明用增九鼎之重彝倫所屬元氣是調乃眷公才作予良弼銀青光祿大夫行尚書省吏部侍郎裴遵慶體凝精粹

理暢黃中學與全經詞深大雅行歸於簡節固其貞公輔之望攸先古人之風非遠累階朝序久踐天臺凡所彌綸多爲故事咸有斯在王猷是經庶弘翼善之功克濟艱難之運登榮瑣闥參政兩闈空輟山公之啓以光說命之求可行黃門侍郎平章事

元年建辰月戊申詔曰天位惟艱廟謨是切委在公輔正于四方佇鼎寶之能調補袞章之有關眷求勵翼式允僉諧朝議大夫行尚書戶部侍郎兼御史中丞上柱國許昌縣子賜紫金魚袋充度支等使元載清明在躬貞固幹事信必可復文而不華準繩朝端



金玉王度不有其善適觀厥成固是生靈之傑咸推  
宰輔之器執茲大政敘以彝倫建中于人莫匪相爾  
丹青神化參議兩闡宐書一德之篇俾協贊賡歌之  
美可平章事兼集賢殿崇文館大學士脩國史餘如  
故

代宗寶應二年正月制曰構廣屢者審象於宏材經  
萬邦者注意於良弼自非道符夢卜名冠簪裾何以  
允副虛求式諧時望銀青光祿大夫京兆尹判度支  
充勾當度支等使上柱國彭城縣開國伯劉晏應期  
生德維嶽降賢文爲君子之儒器蘊通人之量學苞

前典志在於直方詞蔚古風義存於比興自兼京劇  
職總均輸變而能通弘適時之務居難若易多濟物  
之心頃者戎事方殷軍賦惟錯率皆倚辦每務推誠  
寇難初夷皇猷咨弼周王佐國必自于天官漢代登  
台咸由於亞相宐應選衆之舉用成亮采之功可金  
紫光祿大夫吏部尚書平章事勲及度支等使竝如  
故

廣德元年十二月以簡較吏部尚書兼宗正卿李峴  
爲黃門侍郎平章事

二年正月以前右散騎嘗侍王縉爲黃門侍郎太嘗



卿杜鴻漸為兵部侍郎竝平章事

大曆十二年四月制曰體國經務亮采惠疇以遂萬物之宐以刑四方之禮彌縫袞職金玉王猷平景緯於台階濟鹽梅於鼎飪必先時俊允膺旁求朝議大夫守太嘗卿兼脩國史賜紫金魚袋楊綰瞻學懿文崇德廣業表微藏用適務知章朝議郎守尚書禮部侍郎集賢院學士上柱國賜紫金魚袋嘗袞志業貞諒理識宏深守正居中確乎難奪頃以戎車未戢方事仍殷永言庶政有乖彝敘今將本俗刑教澄源振剛宣九德以阜成張四維而翼贊洽于僉論咨爾具

瞻往副審象之誠懋緝時雍之化綰可中書侍郎平

章事集賢殿崇文館大學士修國史散官勳如故袞

可門下侍郎平章事太清太微宮崇玄弘文館大學

士散官勳賜如故初綰為吏部侍郎典選公平以清貞自守元載心疎忌之奏以為國

于祭酒代宗知之遷為太嘗卿充禮儀使以觀其效用載既伏誅乃拜之綰久積公輔之望及詔出朝野

相賀袞為禮部侍郎集賢院學士載之得罪令袞與劉晏李極等鞠之獄竟遂有是拜

德宗以大曆十四年五月癸亥即位閏月甲戌以新

除河南少尹崔祐甫為門下侍郎平章事崇玄館弘

文館大學士太清宮太微宮使時嘗袞獨當樞務祐甫為中書舍人議喪

服與袞異同堅諍不服袞乃奏貶祐甫湖州刺史內議太重改授河南少尹時郭子儀朱泚俱以功高為



相密勿之議莫得聞知而袞假署二人之名及詔出子儀及泚皆表明其不直有詔逐袞湖州刺史而以

祐甫為相

兩換其職八月祐甫改中書侍郎集賢殿崇文館大

學士脩國史平章事如故以通州司馬同正楊炎為門下侍郎平章事崇玄館弘文館大學士太清宮太微宮使初炎為吏部侍郎兼史館脩撰元載為相引炎親重之載敗炎貶道州司馬德宗初即位議用宰相崔祐甫薦炎有文學器用帝亦自聞其名故特徵拜又以懷州刺史喬林為御史大夫平章事京畿觀察使

建中二年二月以門下侍郎平章事楊炎為中書侍

郎平章事脩國史以御史大夫京畿觀察使盧杞為門下侍郎平章事

七月以前永平軍節度使張鎰為中書侍郎平章事三年十月以吏部侍郎闕播為中書侍郎平章事

四年十月帝在奉天以戶部尚書兼御史大夫荆襄江西等道都元帥統軍長史蕭復為吏部尚書侍郎兼御史中丞荆襄江西等道都元帥判官劉從一為刑部侍郎京兆府尹曹參軍翰林學士姜公輔為諫議大夫竝平章事

興元元年正月以吏部侍郎盧翰為兵部侍郎平章



事

貞元元年七月以劔南西川節度使張延賞為平章

事初駕幸奉天延賞陳謨供獻頗效忠力及駕至梁

州倚劔南蜀川為根本即拜延賞為中書侍郎同平

章事至是劉從一有疾乃徵延賞入輔

大曆末吐蕃寇劔南李晟

領神策軍戍之及還攜倡妓歸延賞追之晟深憾焉

晟既建大功以中書令鎮鳳翔表稱宿故懼延賞之免延賞相拜左僕射

二年正月以吏部侍郎劉滋為左散騎嘗侍給事中

崔造中書舍齊映各守本官平章事

三年正月以左僕射張延賞平章事延賞既與李晟

有隙因浙東西節度使韓滉來朝滉嘗獎邁晟又知

帝欲相延賞而有阻乃因會讌說晟使釋憾遂飲

歡且使晟稱延賞於帝前於是復加平章事是月又

以兵部侍郎柳渾平章事仍判門下省事又以前簡

較禮部尚書陝虢觀察使李泌為中書侍郎平章事

五年二月以大理卿董晉為門下侍郎御史中丞權

判戶部侍郎竇參為中書侍郎並平章事

八年四月以尚書左丞趙退翁兵部侍郎陸贄並為

中書侍郎平章事

九年五月以義成軍節度使賈耽為尚書左僕射尚



書右丞盧邁守本官並平章事

十二年十月以右諫議大夫崔損給事中趙宗儒並平章事仍賜紫金魚袋

十四年七月以工部侍郎鄭餘慶爲中書侍郎平章事

十六年九月以太嘗卿齊抗爲中書侍郎平章事

十九年三月以淮南節度使簡較尚書左僕射平章事杜祐爲檢校司空平章事太清宮使十一月以太嘗卿高郢爲中書侍郎吏部侍郎鄭珣瑜爲門下侍郎平章事

順宗貞元二十一年正月丙申卽位二月辛亥詔曰宰相之職寅亮緝熙導陰陽之和贊天地之化裁成百揆總領庶官非道契時中識通理本則何以敷暢皇極阜安群黎朕以眇身嗣守丕業思立人紀以承天休其代予言允屬良弼朝議郎守吏部郎中騎都尉賜緋魚袋韋執誼孝友忠肅自誠而明茂實本於宗師英華發於事業久參內署動直靜專累踐中臺職脩事舉克有公望冠於群倫以予冲人恭默思道是用命爾納誨弼違必能行四方之風成天下之務祇服乃職厥惟欽哉可守尚書左丞平章事賜紫金



魚袋 初執誼為翰林學士知侍詔王叔文幸於東宮傾心附之叔文亦欲自廣朋黨密與交好至是遂特用為相

七月制曰輔弼股肱之臣所與共成天功左右邦理者也朕承至尊之重居群后之上夙興寅畏不敢康寧思所以統天人之和彰祖宗之烈以行四方之政以遂萬物之宜敷求哲人以輔台德銀青光祿大夫守太常卿充禮儀使上柱國鄭縣開國公杜黃裳弘深易簡資博厚之德朝議郎簡較左散騎嘗侍兼左金吾大將軍充左街使雲騎尉賜紫金魚袋袁滋冲茂精微體誠明之性咸以器業閎茂服在大僚祇事

先朝克荷休命識達道與文為國經固可以儀刑具僚參綜庶務寅亮天下毗予一人罔不同心以輔乃辟黃裳可門下侍郎平章事滋可中書侍郎平章事憲宗永貞元年八月制曰有天下者曷嘗不選賢與能納于輔弼用又厥辟以和群生所以敘彝倫平憲度建用皇極底乎雍熙者也朕祇若大訓圖任舊人疇咨庶工用佐予理朝議大夫守尚書左丞輕車都尉賜紫金魚袋鄭餘慶全器茂學蹈中秉直易則可久和而不流嘗踐禁闈亦叅袞職每盡王臣之節實彰君子之風服於大僚克有休問洎綜理會府紀綱



郡司率繇舊章協于成式固可以儀刑庶尹寅亮天  
工可平章事

十二月制曰朝廷者天下之禎幹宰輔者王化之根  
源朕夙寤晨興講求爲理之本思所以仰承宗廟之  
重府協億兆之心諧和陰陽茂育區宇以貞百度以  
序九疇佐予成功實賴良弼具瞻之地公望攸歸朝  
議大夫守中書令翰林學士上柱國賜紫金魚袋鄭  
網秉仁迪哲守約居易懿以支德擇乎中庸體元和  
之淑姿服大雅之明訓累登班序休有令聞羽儀周  
行黼藻王度洎發揮綸翰典職禁闈以溫文雅麗之

才居獻納論思之地從容中節密勿盡規先朝任能  
委遇斯重恪恭夙夜縣歷歲年誠節貫於屯夷茂勲  
參於顧託名書彝鼎心著丹青朕祇膺睿圖誕受明  
命弘宣大典澤潤鴻猷保乂於一人儀刑於萬國簡  
于朕志用選厥勞圖任舊人以輔乃辟疇咨四嶽罔  
不僉同宜膺弼亮之任式懋彌綸之績於戲爲君之  
難在乎舉而不任爲臣之患在乎知而不言事舉其  
中政脩其本永綏厥位時乃之休可中書侍郎平章  
事兼集賢殿太學士

元和二年正月制曰惟人代工與物施化財成者元



首輔翼者股肱况國之號令本於內史政所關決審  
於黃樞爰發四方用寧庶績必求同德資以弼予朝  
議郎尚書戶部侍郎天水縣開國子賜緋魚袋武元  
衡挺生偉才克振前緒蹈禮合樂謙厚端和居暗室  
而不欺處巖廊而益重文能合準吏必立程再司石  
室之圖遂踐春華之署故事可舉嘉猷日新爰委地  
征實惟邦本勤於小物弘以大綱一心不移於吐茹  
衆務必歸於領會儻此時望稱為名臣朕祇奉鴻休  
懼于負荷居則神明之奧位當億兆之尊嘗恐明不  
燭幽慮不及遠一物未獲萬方在予書不云乎臣作

朕股肱耳目是用命爾處茲弼諧爾其慎於將明勉  
於規誨必思袞闕無或面從直哉惟清副我明命可  
朝議大夫守門下侍郎平章事賜紫金魚袋

憲宗為  
太子時

知元衡進退守正及  
用為宰相甚禮信之

又制曰昔周宣王思弘文武之道則以申甫代天工  
漢宣帝思振祖宗之風則以邴魏執邦柄是以克紹  
前烈俱稱中興朕以眇身託于人上亦思所以續列  
聖之緒致太階之平懷柔四夷親附百姓將成莫大  
之業遂獲非嘗之才授之鈞衡俾作舟楫銀青光祿  
大夫行中書舍人翰林學士上柱國李吉甫符彩外



發清明內融休仁而温抱義而俊識洞精曠知皇王  
政理之源學該古今窮天人相與之際自擢于綸閣  
列在禁闈鼓三變之文潤色王度總五材之用參贊  
廟謨化俗思邁於成康致君願及於堯舜當注意之  
所向每罄心而俾陳深中不回獨立無懼經綸嘗見  
其道遠激切多至於涕零王綱以張蜀寇斯殄左右  
密勿實由嘉言降神而生輔朕為理調三光以序六  
氣遂物性而熙帝猷是為中樞思我大本命爾俞往  
其惟勗哉於戲宰輔之任安危所繫百辟為憲萬邦  
所瞻與其明察以為公不若嚴重而有制與其將順

於甚美不若極救於纖違審涇渭以序人倫謹繩墨  
以示天下交泰之運其在斯乎敬聽朕言以踐乃職

可守中書侍郎平章事

三年九月以山南東道節度使簡較尚書左僕射同

平章事燕國公于頔為守司空平章事初頔專有漢南之地不奉

詔旨擅總兵據南陽德宗為之肝食及憲宗即位處肅四方頔稍戒懼至是來朝故有是命因以頔代為節度使

是月以戶部侍郎裴瑄為中書侍郎平章事初瑄罷翰林學

士憲宗知瑄好直信任彌厚因李吉甫出鎮淮南遂以瑄為相

四年二月制曰皇王理本繫於輔弼內以熙庶績釐



百工外以撫四夷式群后三五已降崇替繇之朕祇  
荷丕圖思底于道夙夜惟厲登延俊賢若涉大川俾  
作舟楫朝散大夫守給事中上柱國李藩天鍾萃美  
氣稟清英信任言前行爲人表蘊經邦之識度發自  
明誠見理道之根本爵爲公器學深旨奧文以忠貞  
大玉斯寶于東序朱絃可薦於清廟廣則難挹剛則  
有容處衆無溷其風標存簡較推其名節累登華署  
克贊彌綸擢授左丞專聞駁議永爲股肱之任龔亮  
是資必求其人豈限嘗次黃樞選重僉曰安之爰舉  
朝章式副公望於戲爾惟率正邪罔不懲惟匪躬直

誠可以事上惟秉約平施可以致和毗予一人允理  
三事懋乃攸績永孚於休可朝議大夫守門下侍郎  
平章事賜紫金魚袋

五年九月制曰夫宰相之任上以代天工輔佐之宜  
下以立人極爰得忠正方膺股肱正議大夫守太嘗  
卿上柱國襄武縣開國侯賜紫金魚袋權德輿器度  
端實智識通敏學成師法文爲國華素履嘗踐於貞  
方黃中允合於易簡自出入清列茂著嘉猷名利無  
屑於中懷風雨不易其嘗性驥騄之質嘗識於遠途  
鸞鳳之姿安巢於阿閣期於致理推之至公寵以春



卿掌我樞務輔天地之德俾化及清寧道陰陽之和使物靡疵癘予違汝弼言無面從君可臣否事已心許用佇弘美式副虛懷可守禮部尚書平章事散官勲封賜如故

六年正月制曰輔弼之重邦家所屬寄深垣翰則外撫諸侯望切股肱則入熙庶績迭居其任厥惟舊哉前淮南節度副大使知節度事管内支度營田觀察處置等使金紫光祿大夫簡較兵部尚書兼中書侍郎同中書門下平章事揚州大都督府長史上柱國趙國公食邑三千戶李吉甫弘經遠之才研極深之

慮脫落細故洞開中懷文稽典慕學升堂室洎司我密命言屢表於獨明參予袞職道每彰於孤直貢其誠節竭以公忠墜典載張彝倫攸序輔予不逮懷之豈忘曩以江淮大都吳楚雄鎮歲屬艱食人多愁聲是假全才用康疲俗下流乎水利不憚乎勞心故蠶以長塘滯其天澤變舄鹵爲稻梁之壤致蒸黎有衣食之原吏守成規人無遷志庶富之教旣宣於封內輔相之宐俾及於天下顧茲重務屬於良臣去其外職之繁專以中樞之任至於別館良吏之褒貶內殿集賢之清秘爰舉舊典式洽新恩無曠厥官往踐乃



位可中書侍郎平章事兼集賢殿大學士兼脩國史  
十二月制曰司重柄者允屬於長材熙大猷者固資  
於端士朕纘承鴻緒撫有萬方夙夜祇勤懼遠於道  
故每注意宰輔勞懷夢想誠以得失之效邦家所繫  
若僉論簡予深衷必惟其人是舉成命朝議郎守  
尚書戶部侍郎驍騎尉賜紫金魚袋李絳質秀珪玉  
文含采章抱器挺生居貞特立有史魚秉直之操勵  
山甫匪懈之誠忠孝兩全學識兼茂清標可以範雅  
俗正氣可以肅群倫頃自周行俾參密命動必以義  
知無不爲審審懷經濟之心孜孜陳遠大之畧言無

隱避名則靜專貫于始終其道一致地卿之貳爰委  
典司理財先示于簡廉利物每懲于聚斂經通立制  
器用彌光臺閣之間鬱有公望是宜權衡百度宰理  
庶工允副具瞻掌我庶務於戲予欲驅人俗以躋富  
壽感人心而致和平爾尚脩明憲章宣布德澤必廣  
大其志無皦察爲公任之以職無忘陳平之言苟便  
于人勿憚蕭何之請敬茲寵擢其懋戒哉可朝議大  
夫守中書侍郎平章事

八年二月制曰邦國興理將相是咨選衆而舉思賢  
俾乂故有台臣外撫宣力以靖於四方袞職迭居懋



功復凝於庶績允茲崇踐爰屬上才前劔南四川節度副大使知節度事管内支度營田觀察處置統押近界諸蠻及西川八國雲南安撫等使銀青光祿大夫簡較吏部尚書兼門下侍郎同中書門下平章事成都尹上柱國臨淮郡開國公食邑二千戶武元衡粹厚端莊簡易嘗一有成名之道以致用有宏茂之畧以佐時直方自得於性術操尚不愆於風雨加以懿文合雅聚學承師通禮樂刑政之源達古今訟變之要歷登華貫休問穆然泊處鈞衡中立不倚致君思堯舜之盛脩職以邴魏爲宗翼載之勤夙夜彌亮

彝倫攸敘鼎飪載和益部大藩比伏兼濟而能布宣威惠撫控蠻髦縣道輯寧疲黎安息推心而士皆率附正已而人自嚮方臨之累年理有異等朕以出納王命緝熙帝圖總庶官之職業爲百度之扃鑰惟此重任屬于黃扉分憂遂輟於殿邦具瞻再歸于頽望爾尚行之以中正煦之以和平毗予一人膏潤天下祇服禮命無替令猷可守門下侍郎平章事兼崇玄館太學士充太清宮使

九年六月制曰虞以爲盛猶咨五臣殷之用興亦賴三后朕勵精恭已十載于茲嘗以國約委之公輔務



熙庶績敢怠旁求思欲左右有人在廣股肱之任歷  
選列辟洎于草澤異獲能賢俾弘正道今茲所命允  
屬至懷河中晉絳慈隰等州節度度支營田觀察處  
置等使正議大夫簡較禮部尚書兼河中尹御史大  
夫上柱國高平縣開國子食邑五百戶賜紫金魚袋  
張弘靖德稟精微器含冲用溫恭諒實明允克誠素  
推君子之風雅有大臣之體蘊積稽古之學發揮經  
緯之文嘗司朕言勲協謨訓歷踐清貫具揚淑聲爰  
統方州載膺節制奉法遵道勤公忘私人無不懷績  
用丕茂予欲正百工之理開太平之階若臨巨川以

重舟楫是用命爾參列中台每念臣隣之規以貞棟  
崇之吉少翁積慶嗣德漢廷文子勤身繼主晉室爾  
惟朝夕納誨以翊朕躬是資袞職之勤式重緇衣之  
美仍帥司寇之屬俾靖臯陶之刑懋宣厥繇往踐於  
位可刑部尚書平章事散官勲封如故

又制曰彌成大化參敘彝倫克光元首之明斯其股  
肱之任所以不自遐逸務求賢能式重舟楫之才以  
弘經濟之道疇若予采僉諧乃公中大夫守尚書左  
丞上輕車都尉賜紫金魚袋韋貫之清明在躬禮樂  
之器蘊珪璋特達之德茂廉正博雅之觀靜而知微



丹精元龜命相三 卷之七十三  
動必有守凡踐列位備聞嘉猷當官而行臨事而斷  
道可正于風俗望彌積於朝倫是宐和靜陰陽紀綱  
邦國命作心膂列于台階夫能慮四方揆百事愛利  
萬物辨論群材公以忘私時乃之職而况圖靖藩服  
繫在廟謀爾惟順下以訓人奉上以宣力因衆功而  
致用熙衆志以爲心朝夕獻可否之誠經綸底文武  
之績祗膺厥服勿懈于時可守尚書左丞平章事散  
官勲賜如故

十年六月制曰輔相之任重作予股肱經濟之才難  
在人耳目苟非慮研物表識洞事先則何以出納中  
樞平章大政詢於時論僉曰汝諧朝議郎守御史中  
丞兼尚書刑部侍郎飛騎尉賜紫金魚袋裴度勳正  
循道清明秉彛文融菁華行茂枝葉居然廊廟之器  
出於領袖之門西掖司言南臺執憲嘗陳明畧屢告  
嘉猷實宣力以徇公能外身而憂國霜雪無改風雷  
有嘗朕欲旋觀其能明試於事俾歷戎閫載馳使軒  
玉澤渙汗以遐宣軍情密勿而上達將議抽擢因罹  
震驚崇道德之濟薩士有致命資忠信之甲冑兵無  
容刃人具瞻爾天方賚予昆命于龜爰立作相爾其  
展四體堅一心廣其道以用賢厚其風而易俗五兵



未戢爾惟保定武功百姓未康爾惟勤卹人隱臨事必斷當官而行濟台階以至平補袞職之有關光膺

慎選其戒之哉可朝議大夫守中書侍郎平章事度

制誥時田弘正初以魏博順命度宣慰弘正軍中及見境內百姓布揚德澤上下感悅還奉稱旨度勁辨能言軍國情體通達物情尤尚感激繇是將帥多悅自淮西行營還帝益聽信猶以武元衡輩在尚未用度元衡遇害便以大計屬度度初以瘡卧二十餘日詔以衛兵宿第中使日不至未拜相先一日遣使詔度不用到宣政參暇便來延英候對及見念問周悉明日又召使受制命時外集天下兵而內有大恐及度任政人情始繫以安危

十一年二月制曰朕觀古先哲王興化致理未嘗不選建良弼熙寧庶政俾之敷陳大猷左右乃辟者也

朝議郎守中書舍人權知禮部貢舉輕車都尉賜緋魚袋李逢吉疏通而守於經制質厚而輔以文華貞嘗自居和易待物體賢人之志業茂端士之風規履歷班行發揮事任厥心匪懈所至有聲自彌綸粉闈駁正瑣闥且司言於左掖當納訓於東儲誠明一貫聞望旁洽俾司貢士亦著嘉聞方今外興不得已之師內有不獲安之俗嘗忘食於將旰每求衣於未明異清原野之誅用止干戈之役登爾輔弼代予憂勤爾宜敷至化於吾人告嘉猷於厥后銷弭氛祲導迎和平事有不舉其中政或未孚於下爾惟啓沃無乃



面從可朝議大夫守門下侍郎平章事賜紫金魚袋

時逢吉知禮部貢舉既策試未榜第其名而有是命禮部尚書王播署而出之

是年十二月制曰上宰參職所以法三台之耀中樞議政在乎遂萬物之宜朕獲承鴻休思建皇極翼沃心而納誨嘗注意以求賢通議大夫尚書工部侍郎知制誥翰林學士上柱國清源縣開國男食邑三百戶賜紫金魚袋王涯動直專靜踐方居易挺歲寒之勁質抱夙夜之端誠言皆守中慮每經遠屬者禁垣揮翰五字日宣選部持衡九流風動薦居肘腋之地歷試股肱之才進嘗伏於青蒲出不洩其溫樹牟融

得大臣之節毛玠有古人之風詢廟算以生知論兵鈴而暗合方今我車尚駕郊壘猶多必候清明以消氛沴是用付以機密陟于崇高爾其發號令以靖其四方陳便宜以寬于百姓行臺閣之故事弘朝廷之大體秉德以立徇公不回予一人垂拱而理敬聽成命懋哉戒哉可守中書侍郎平章事

十二年七月制曰成萬方之化通天下之志緝熙帝載昭暢玄猷在于股肱之臣共凝理本旁求時彥以敘彝倫朝散大夫守尚書戶部侍郎上護軍賜紫金魚袋崔群粹密由道端莊保和本清明之上才體博



厚之重德學貫通儒之業詞含大雅之風居敬有嘗  
循性能斷自承密命職參內廷高文煥發于綸言敏  
識詳達于國典伏奏無撓直躬不回勤勞八年始終  
一致春闈取士必後其浮華地官理財能制於輕重  
儉以約已忠惟事君才適而用深望積而實著風猷  
已洽于人聽倚屬方注于朕心乃膺審象之誠以副  
具瞻之望况姦兇叛逆尚駕我車未明求衣思戢干  
櫓爾宜酌古今之要舉刑政之中艱厥位以代天工  
陳其謨以明皇極敬茲重命往踐台階可守中書侍  
郎平章事

十月制以淮南節度副大使知節度事管内度支營  
田觀察處置等使銀青光祿大夫簡較尚書右僕射  
兼揚州大都督府長史御史大夫江夏縣開國侯李  
鄴爲門下侍郎同平章事

十三年三月詔曰致理之道王者猶盡其心躬成之  
功輔臣所以宣力皇極是建蒼生乃安敷求實難倚  
任斯重將付大政必惟僉諧正議大夫守御史大夫  
上柱國成紀縣開國侯食邑一千戶賜紫金魚袋李  
夷簡才稱通明性本嚴重守以正直傳之文華羽儀  
朝端冕耀宗籍早司邦憲爰總地征糾逃無間于避



強經費克均其定制中立不撓孤標出倫聳善激貪  
法行令肅自鎮漢上泊臨蜀川儉德載彰清規一貫  
山嶽比厚風雷有嘗勵貞俊以理心竭忠勞而奉上  
人望汲黯印歸趙堯俾之持綱萬目皆舉固可以參  
綜庶務允釐百工燮和陰陽宣發號令是申明命陟  
于台階於戲誠積爾躬夢協朕志虛已將求其弘濟  
鯁言罔懼于拂違道必舉中位無苟曠膺此寵擢敬  
哉戒哉可守門下侍郎平章事

十四年七月制曰贊天工而成光濟協帝力以致升  
平非中和稟氣不能符燮諧之道非誠明在躬何以  
庸弼亮之位况今積妖已殄而邊鄙猶虞大化方行  
而里閭未泰時欲舉百度甄群材外經四夷內輯諸  
夏納之壽域被以仁風代予之勤其孰克任眷求斯  
得是用命之和陽三城懷州節度使朝議郎使持節  
懷州諸軍事守懷州刺史兼御史大夫賜紫金魚袋  
令狐楚根於粹厚著以端明表山立之莊容洞淵停  
之精識文高雄富學茂該通自頃揮翰被垣持橐禁  
署常延造膝屢竭啓心發言必誠臨事無惑藹是公  
望居然國楨及剖符近郊兼暢牧人之術杖節分闡  
尤深馭衆之才謂器適中外效宣文武宜展舟楫之



用式登鼎鉉之司管于中樞持我大柄於戲輔翼之任人臣極崇未至而重議有歸既處而其名罕聞萬務攸託朕何賴焉爾其敬聽此言深思其道行致君之志始終勿渝以報國爲期夙夜益勵無俾厥后有慙知臣可朝議大夫守中書侍郎平章事

八月制宣武節度守司徒兼侍中韓弘可守司徒兼中書令以弘堅辭戎鎮故也

穆宗元和十五年正月卽位是日制曰廊廟之任萬邦所瞻調一氣之和序五材之用出納王命發揮帝猷簡求賢能弘我理本朝議郎守御史中丞飛騎尉

襲徐國公賜緋魚袋蕭儉識通化元道契休運有戴君峻節之志秉見義匪躬之誠代襲公台族高軒冕學冠古今之要詞深雅誥之宗嘗事先朝職居宥密奏議無撓忠勞益彰洎執憲南臺肅清朝序休望彌洽直聲日聞朕方臨萬邦思致于理若涉大水浩無津涯將務簡以安人欲息兵而論道審象而授其代予勤爾其端志絕私去末崇本敘禮樂于邦國正風教于人倫舉其鈞衡明示天下無俾一德專美于殷爾其敬之奉我成命可朝散大夫守中書侍郎平章事仍賜紫金魚袋



又制曰賚於良弼期有濟人必惟才臣乃克成務况  
端潔剛毅可以肅具寮敏裕周通可以熙庶績外無  
飾虛之禮中有效實之誠簡于朕心乃命以位朝散  
大夫中書舍人翰林學士武騎尉賜紫金魚袋段文  
昌門襲忠勲器苞才傑廣而不雜峻而能溫脩詞每  
掇其菁華所尚者風格發言必探于指要所貴者變  
通識古今理亂之源知遐邇利病之本自掌文翰苑  
列籍金門出入五年恭勤一致屬朕初承寶命屢進  
嘉猷諒我憂惕之懷竭其公忠之志昨因召見更有  
詢咨造膝之言注意斯得必能奉將命之大任申獻

替于虛襟爰升鼎鉉之司興展舟楫之用於戲萬務  
之始九有所瞻將致治平可不兢勵爾其夙夜惟慮  
弼輔朕躬使四夷咸賓百度惟理阜俗必蘇於瘁瘵  
審官無鬱其賢能理當詳於幾深道當固于久大惟  
自誠可以化物惟先已可以律人勉哉戒哉無忝我  
首命之重可守中書侍郎平章事

八月制曰夫宰相者上調元化以亮天工下熙庶績  
以輔君德未有心不直而能協於道迹不正而能致  
其君必求斯人乃命以位朝議郎守御史中丞武騎  
尉賜紫金魚袋崔植氣志凝遠風標粹清率性而行



潔已以進周歷臺閣藹然聲猷頃者姦臣未降利權  
方擅情惟刻下其事將行而植獨能橫抗申以駁議  
朕每嘉重不忘于懷自膺寶圖俾掌邦憲又能悉心  
秉執造膝敷陳歸于無私多所弘益爰擢作相冀能  
弼予於戲惟爾先太傅當德宗始初清明首居相位  
克固直道至于今稱之爾其嗣乃家法無廢朕命可  
朝散大夫守中書侍郎平章事又制以中書侍郎平  
章事蕭俛爲門下侍郎平章事

九月戊午制曰懷大中者必誠其茂勲建茂勲者必  
極其高秩朕虔守鴻業靜思化源姑欲表忠節以勵  
爲臣舉勲籍以勸立志况乎位崇上相遇重先朝首  
陳宏圖躬率群帥克定妖孽坐清寰瀛得不再申袞  
崇昭示倚注河東節度觀察處置等使金紫光祿大  
夫簡較尚書左僕射兼門下侍郎同中書門下平章  
事大原尹北都留守上柱國晉國公食邑三千戶裴  
度材膺啓運道協功借一心盡忠百志歸正雖量包  
弘曠靡所不容而節抱孤貞凜然難奪所以特承恩  
顧專委謀猷堅持其誠獨立不懼在昔有晉厥功平  
吳惟茂先決策於中惟元凱整旅于外兼能竝用度  
實有之許國忘身勤亦至矣自居重任出入六年及



鎮太原聲績一貫朕永懷丕烈乃睠舊臣將副深衷  
式加新命惟正三公之位在乎九土之司論道再光  
總戎益重毗我王室永孚于休可守司空依前兼門  
下侍郎平章事

長慶元年二月制曰先朝正姦邪之罪刑海內之心  
既承大勲付朕鴻業思欲述事繼志偃武脩文揚其  
耿光屬在髦傑朝散大夫守尚書戶部侍郎知制誥  
翰林學士上柱國建安縣開國男杜元穎識稟人秀  
才爲國華氣縝密以含章言清明而體要廉方不雜  
峻直無徒動朗鑒而心運陽秋鼓雄詞而氣幹河嶽

爰以精粹列于內庭通賈生治亂之言達管氏刑政  
之本未至高位蔚爲名臣間者妖孽相挺紛亂南北  
朝夕機命迅如風霆而翰動若飛神無滯用思戢必  
盡其心力避榮常執其謙光况處奉綴衣導揚訓命  
雅仗忠貞之志實有安定之功本于忘身愛我以懷  
感激無隱切劘盡規旣納誨于三篇亦陳戒于六事  
朕嘗委以大政詢其遠猷研幾必精應變嘗理布舊  
章于河朔推大信于昆夷無所不諧實由密贊全器  
焜耀淑聲流聞升于台階允是瞻望於戲昔爾先正  
爲唐宰衡惟爾傳臧孫有後之慶秉邵公是似之德



空纂舊服協于至公乃思貽厥之謀率攸行之道扼制群動衡平衆流俾人不迷時乃之績乃守尚書戶部侍郎平章事散官勲竝如故

十月制曰昔蕭何用新造之漢而能調發子弟完補改亡使關東糧餉不絕者以其盡得秦之圖籍而用知其衆寡也我國家承十一聖之區寓億兆人之生齒而曰不能足食足兵朕甚憐焉則非惟調陰陽撫夷夏者不欲侵泉貨之任而主會計較盈虛者不得參邦國之重乎予將兼之允在能者諸道鹽鐵轉運等使大中大夫守刑部尚書騎都尉大原縣開國男

賜紫金魚袋王播在德宗時以對詔入仕踐更臺閣由御史中丞尹京兆掌縣官鹽鐵爲春曹尚書乃長巴彘以控蠻蛋盡稱厥職達于予聞洎詔徵還便殿與語得所未得聞吾未聞昭然發蒙幾至前席重委操剗鐸刃益精國有羨財而人不加賦東師在野物力蕭然不有主張孰能戡濟是用命爾作相仍以舊務嬰之爾其西備戎羌東定燕冀內實九府外豐萬人百度群倫罔不在爾於戲典謀訓誥行之居存邪正是非知之孔易予唯以不敏不明茲用爾爲股肱耳目又安能一二戒誨垂之空言爾其自勵于爾心



無令觀聽者論爾于鄉較可守中書侍郎平章事依前充鹽鐵轉運等使

二年二月制曰朕聞御大器者登俊賢以爲輔弼敷大化者擢公忠以施政教故能成天下之務達天下之精俾三光宣明百度貞正我之倚注方得其人天實賴予允副僉望尚書工部侍郎元稹珪璋茂器鸞鳳貞姿文涵六義之微學探百氏之奧剛而有斷忠不近名勁氣嘗勵于風霜敏識頗知於今古自格居朝序休問再揚不自飾以取容不苟安而回慮處直忘屈在屯若夷卓然懷陶鑄之心豁爾見江湖之量

聞者司文禁署主朕樞機每因事以立言累披誠而獻計心惟體國義乃忘身深陳濟物之才雅見經邦之志朕思弘理本用治生靈式資康濟之材以暢和平之化於戲爾率于正則不正者知慎爾進于善則不善者必悛惟直道可以事君惟至公可以格物是茲數德毗予一人永孚于休以底於道可平章事又制曰涉大川者操巨艦不畏於洪波構廣廈者揭雄材乃安於棟宇朕祇奉神器尊臨萬邦思弼諧輔相之臣致易簡雍熙之業爰澤舊德委之樞衡冀弘嘉猷以闡玄化淮南節度副大使知節度事管内營



田觀察等使光祿大夫守司徒同中書門下平章事  
 兼揚州大都督府長史上柱國晉國公食邑三千戶  
 裴度氣稟宏廓材優康濟達識高議兼明不渝儀刑  
 可以光巖廊度量可以方海嶽操握政柄弛張化權  
 彝倫典謨合若符契昔我先聖以武畧深計中樞密  
 勿委之廟堂四海咸理朕仄席虛已勞懷宵旰禮命  
 元老聞斯格言衷懷洞然雲霧皆豁是用輟撫淮南  
 舉之台袞換其戎律列自黃扉秩崇上公望積帥長  
 寄爾以周召待爾以蕭曹任爾以埏埴授爾以鈞衡  
 於戲祗席樽俎之內堂室牖戶之間無俟規臨可以

觀察違爾宴息期爾折衝庶乎陰陽協和品物昭泰  
 惟言是納爾舉必從使益稷臯陶爾無慙德垂衣南  
 面我獲任賢無易斯言式遵明命可守司空兼門下  
 侍郎平章事度拜淮南未行有徐方之變兼河北諸  
 軍進退未一言事者亦多以度出非空  
 及詔下人人望度勉日定理  
 六月制曰朕聞天地洪鑪致之者橐籥帝王大業成  
 之者股肱故堯舜垂衣禹湯恭已弘道任德為予輔  
 臣則八表乂寧萬邦咸理故伊尹之舉臯陶之升庶  
 績其凝不仁自遠正議大夫守兵部尚書輕車都尉  
 賜紫金魚袋李逢吉大方比量中正持心真玉無瑕



堅金在礪峻節而高山是仰推誠而止水可觀剛柔  
所持吐茹無易往以青宮齒學道我典墳儀刑式孚  
蘭蒞馨茂洎升台席翊奉先朝訃謨密聞獻替潛達  
外順昭德中升至言溫恭聿脩始終一貫朕嗣守丕  
業思得賢良將俟和羹期於舊老易之襄漢居以南  
宮每詢嘉言啓沃惟久今授之相印委以樞衡代天  
之工爾在專任於戲發號施令選賢與能申于百辟  
之上行於四海之內朝無黨比人絕澆浮白黑燦然  
淄澠不溷使巖廊重位揚我清風弘宣大猷以暢王  
度可守門下侍郎平章事

三年三月以戶部侍郎牛僧孺平章事

敬宗長慶四年正月卽位制曰理多務者必資經遠  
之能總衆材者實在選舊而任疇咨輿議參詢廟廷  
果獲誠臣副予虛位正議大夫尚書吏部侍郎上柱  
國渭源縣開國男食邑三百戶賜紫金魚袋李程文  
含鍾律器挺珪璋行已蹈嘗與物無吝早以詞翰密  
侍帷幄開弘顧問發揮訓謨周旋臺閣閱歷中外秀  
造稱其得俊衡鏡表於無私卑牧難踰深藏不耀朕  
荷負重構祇守大業自顧寡昧動遵先規委成台司  
不操將斷自居無悔之地以馳至正之途而元輔勇



於進類當思任人與其自仕不若用賢命之僉求以名列上而程爲舉首是必至公爾宜謹繩墨以示諸侯平好惡以待多士秉彝倫以澄躁競覈名實以鎮浮虛協睦乃僚無替朕命爰因銓品之鑒載佇烹飪之功可平章事

又制曰昔周宣王漢宣帝思弘祖業克紹先構用申甫邴魏爲相然後周道重熙漢德累洽朕以冲眇託千億兆之上緬惟文祖玄宗之理若涉大水浩無津涯詢於巖廊俾舉髦碩果得才傑副予虛求必惟其人乃命以位朝議大夫守尚書戶部侍郎兼御史大

夫判度支上柱國賜紫金魚袋竇易直端厚靜慤直方簡廉氣深而和識敏而達每去華而務實不爲善以近名早以器能揚歷中外司憲著紀綱之積廉俗垂惻隱之仁輟于天官掌我邦計底慎材貨均節委輸賙給不窮瞻濟皆足國有大柄屬於全才况朕新臨寶圖萬物資始審像而授其代予言爾尚弼予一人用底于道且漢以丞相調兵食周以冢宰質歲成我國家雜用古制以重其事也爾往欽哉無忝我成命可平章事判度支

寶曆二年二月丁未制曰朕周觀帝王之道春秋富



則倚附舊老享歷久則簡擢俊髦故我玄宗開元之  
始任宋璟姚元崇之輩以調陰陽東封之後乃用李  
元紘張九齡之儔以承法度洎予恭守大位于今三  
年巖廟藩封建于左右前後皆皇祖聖父之人罔有  
易置况勲望冠代器業絕倫副予揣論贊此休運凡  
百有位敬而聽之山南西道節度觀察處置等使光  
祿大夫守中書門下平章事兼興元尹上柱國晉國  
公裴度以忘家抵患協于憲宗以匪躬不撓佐於先  
帝十拜相詔四登師垣接士猶布衣之心悲時急戀  
闕之思價重乎內外名殷乎華夷藉是風猷俾參大

柄且滿吾志亦用僉聞於戲君臣合符不可多得乎  
載一遇猶爲比肩爾宐援古以自強垂後以君重交  
終之畫一平陽之弁容諸葛持衡之公相如引車之  
意率彼四子足爲成人服茲昌言往踐乃位可守司  
空平章事是月丙寅以中書侍郎平章事李璣攝中  
書令受冊正衙宣制貞白東坡集卷之四文獻通考  
文宗寶曆二年十二月卽位庚戌制曰構大厦者實  
先梁棟之材濟巨川者必資舟楫之用朕越自藩邸  
庸期大統夙夜震兢若蹈淵谷况齊思毗又艱步甫  
寧上奉山陵七月之期內停討謨庶政之始俾我耿



末寘之極樞將欲興運之功俾協具瞻之望博閱名實獲茲忠賢實帝賚予其誰與讓正議大夫行尚書兵部侍郎知制誥充翰林學士上柱國賜紫金魚袋韋處厚體道爲徒見義爲勇居易以行古至和而不流冰霜挺松栢之姿貞白秉珪璋之德文揮風雅學該儒玄器洽而保之以謙識明而用之以晦選自經藝侍于穆宗擢司密命實贊先帝壹彼直操彰其遠猷臨危勵難奪之誠推忠備弘益之道屬者變生宮掖謀俟經綸首參底定之功載竭忠貞之效雪憤橫涕披肝貢詞約我以禹湯罪已之勤博我以古人致

理之要聽必感動悉其條陳洪纖靡差夢卜斯協必能式是中外啓茲雍熙俾予冲人克遂垂拱是用擢升鼎鉉式亮帝圖庶無愧於知人且用光於斯道於戲前哲有言良臣惟聖主處殷憂舉衆之任荷濟理沃心之期注四方傾動之勤在百辟具瞻之任可中書侍郎同中書門下平章事

太和元年六月癸巳以淮南節度副大使王播爲尚書左僕射同中書門下平章事

冊府元龜

冊府元龜

帝王部

卷之七十三



冊府元龜 命相三

冊府元龜

淮南李嗣京參閱

西極文翔鳳訂正

豫章黃國琦較釋

帝王部

七十四

命相第四

唐文宗太和二年十二月制曰綏緝萬邦實資乎元首  
肅成庶績允屬於股肱將以導宣化源崇固理本  
立我皇極贊於時邕故任賢著於禹謀納誨彰於說  
命眷求懿德斯惟僉諧中散大夫守尚書兵部侍郎



知制誥充翰林學士上輕車都尉賜紫金魚袋路隨  
性稟中庸氣含大雅身無擇行學不爲人敏識周通  
宏才恢博挺然仁者之勇蔚爲君子之儒祇事穆宗  
侍經內殿敷堯舜之大典暢周孔之遺風雅言玉音  
與義冰釋潤色王度發揮聖聰出入禁闥踐履華貫  
位彌高而惟謹任愈重而滋恭逮及先朝復叅密命  
雍容侍從早以賦於甘泉左右便蕃未嘗言及溫樹  
周旋九載始終一心直道匪躬謹言盈耳每訪謨猷  
之指用陳裨益之誠出不忘於詭辭退必聞於削藁  
器可經國忠能致君跡其公正之方用外毗倚之任

於戲干戈未息爾其弘智用以靜寇懷後成尚勤爾  
其宣柔服以懷戎狄均國賦以安阜百姓振朝綱以  
綜覈群才退無後言動必慮善貞爾百度彌予一人  
寵以峻階委之極務往踐厥位時乃之休可正議大  
夫守中書侍郎平章事

四年正月詔曰昔漢宣帝用魏丙以成中興之業我  
玄宗任姚宋以致開元之理其術無他得賢而已朕  
猥居大寶首涉五年宵旰靡遑憂勤至切將倚任於  
國柄空登進於人傑俾其復運樞極載清化源斷自  
朕懷允膺僉屬武昌軍節度鄂岳蘄安黃申等州觀



察處置等使金紫光祿大夫簡較吏部尚書同中書門下平章事使持節鄂州諸軍事鄂州刺史上柱國奇章郡開國公牛僧儒氣含元精體包大雅識用夷密襟靈純粹窮聖賢旨奧之學鋪邦國經緯之文蔚爲名臣秀出群萃長慶御曆登賢濟人廊廟有光臣工得職代天協理時乃之休先朝與能罷出征鎮阡俗丕變師旅太和宣力事君時乃之蹟朕飽聞器業虛佇風儀會曹參之促裝喜韓侯之來覲便殿延對前席與言通古今理亂之源知教化損益之務其應知嚮不知所然是宜卿長夏官平章大政康濟四海

毗予一人於戲君不能自爲堯舜必待其臣以致之臣不能自爲伊臯必待其君而任之致則期於盡力任固在於聳善然後上下交泰君臣相須爾其使百官得其人萬事得其序邪正之路必判清濁之流必分金堅一心扼制群類無重否德予皆仰成可兵部尚書平章事

七月詔日出納大命宰司元化調四氣以統和天人貞百度以鎮安夷夏必資髦傑用委鈞衡朕嗣守丕圖思弘至理萬物之重屬於台臣及席勤求冀禋不迨况素效久彰於密勿精才已得於詢謨擢自內庭



授以袞職爰立佐佑斯爲得人朝議郎守尚書右丞  
上柱國賜紫金魚袋宋申錫岳降全德天資正性處  
約居厚蹈中秉藝文每掇其菁華學必探其玄蹟風  
播休問拔乎群倫自選入周行參我內署奉職恭肅  
率心坦夷蘊冲用以究國經鋪訓詞以潤王度密贊  
彌久弘益滋多朕累因暇日召於別殿訪以大政觀  
其立誠而曾襟洞開肝膈無隱識精詞直實契虛求  
固可以掖持化權參決理本是用升於鼎鉉付以樞  
機繇仙闈總轄之司當宰輔具瞻之地熙此庶績彌  
予一人於戲元首以司牧萬方股肱以協贊皇極上

推公以馭下臣竭忠以載君際會交感而臻大化歷  
視前古何莫繇斯予方率是道以臨兆人爾宜悉乃心  
以成一德敬戒厥位求孚于休可正議大夫行尚書  
右丞平章事

七年二月制曰弼亮鈞衡宣翼統紀明景化以凝庶  
績啓嘉謨以建大中爰求國禎以輔台德銀青光祿  
大夫守兵部尚書上柱國贊皇縣開國伯食邑七百  
戶李德裕元精孕靈和氣毓德堅直成性清明保躬  
貞規澹夷敏識冲遠學宗九流之奧文師六義之宗  
令聞夙彰僉諧允屬自提綱栢署掌誥禁闈釐紀律



詳平之司竭訃謨密勿之節洎察廉浙右總鎮滑臺再委旌旄緝安邛蜀克有殊政咸懷去思諒惟全才茂此聲績朕以疇庸之典彝訓所先入遷司馬之崇彌積濟川之望是宜納誨朝夕擢居股肱勉弘伊呂之勲以嗣嘗平之美業傳相印門襲戎旃紹絲綸內職之榮繼鼎鉉中樞之重珪綬之盛恩輝罕儔爾宜罄乃忠貞副我毗倚無忝承命服茲寵光可本官平章事

七月制曰居端揆之任再踐國鈞稽筭權之功兼司邦計爰崇舊德以緝新規簡自朕心用久僉屬金紫光祿大夫守尚書右僕射充諸道鹽鐵轉運等使上柱國代郡開國公食邑二千戶王涯元精降靈體道秉哲恬智成性清貞保躬文行可以經邦風操可以鎮俗以明用晦處貴滋恭憲宗以禁署竭忠擢登輔弼先帝以台階宿望寵授旌旄陰陽燮調藩服寧謐機務允理政經交脩洎綜銓九流式序百禮提旌紀律統明貨泉法必便人事先體國聲績茂暢洽於群謠朕以邊鄙防微猶存兵戍資儲之備供億尚繁頃者支費轉輸任分兩使量入制用誠患多門俾足食以豐財在省員而簡務是用合此二柄委於元僚正



茲通變之初籍我股肱之重勉思率職無或憚煩敬  
戒乃心欽承休命可本官平章事充度支及諸道鹽  
鐵轉運使

八年九月壬戌詔追興元節度使李宗閔赴闕十月  
庚寅詔曰職代天工望歸人傑必資求舊允副僉諧  
山南西道節度管内觀察處置等使兼興元尹銀青  
光祿大夫簡較禮部尚書同中書門下平章事上柱  
國襄武縣開國侯食邑一千戶李宗閔巖廊正人宗  
室全德才惟不器道實生知粹茂體陰陽之和周旋  
成禮樂之用外弘疎朗中實誠明白璧凝溫朱絲秉

直文窮三變學洞九流早以忠規契于審象雅有玄  
畧能宣大猷底寧戎蠻協贊郊祀見可而進知難靡  
回啓心嘗罄其嘉謀造膝必聞其法語行父事君志  
存於嫉惡臯陶承弼道遠于不仁康濟而金柅有倫  
燮調而玉燭無爽騫謬勵大臣之節端莊清至化之  
源脩明典章慎選方岳敷我利澤臻于至平自出鎮  
漢中旣周星律世俗雖歌乎來暮國人頗詠于去思  
遂用徵還蓋從公望及延召宣室益加前籌是宜再  
涉中樞直脩衮職咨爾良輔其聽朕言夫天地交泰  
則時合君臣訢和則國治眷求一德出納萬機勉弘



如水之心式副濟川之用命官罔及於私昵詔爵必俟于賢能俾庶績惟凝彝倫攸敘無忝注意敬之戒之可守中書侍郎平章事

九年四月詔曰寅亮皇猷丹青景化爰從選衆之舉乃得非嘗之才前浙西道都團練觀察處置等使朝議大夫簡較禮部尚書持節潤州諸軍事兼潤州刺史御史大夫上柱國姑臧縣開國男食邑三百戶賜紫金魚袋賈餗識達韻孤學深行直真和自立介持不群能操至公每契中道聲逸群聽善諧朕心自居京師尤彰望實亟召便殿屢陳嘉謀罄肝膈以納忠

規推誠明而無外飾察言考事深用得之近命列藩益聞僉論固可以叅我大政陟于中樞天啓予懷賚此良弼爾其守法制平鈞衡貞王度以振國經釐百工以凝庶績舉直錯枉當官而行於戲爲君之戒在知賢而不任爲臣之患在保位而不言罔或依違虧吾則誓可中書侍郎平章事

七月詔曰惟昔太宗聰明睿聖克致治平惟魏徵左右文祖叶建皇極矧朕寡薄思紹丕烈旁求魏徵之比寘諸巖廊庶禪不逮用底于道御史大夫李固言生于山東瑞此王國爰在下位早揚直聲介然無朋



中立不懼文經邦俗行表人倫和嶠負棟梁之材辛  
毗有骨鯁之操便蕃華貫光啓令圖日者徵自近郊  
延於便殿言多方格道不容回嘉謀有倫正色無撓  
朱絃暢疏越之韻美玉呈特達之姿泊長憲臺彌彰  
休問固可以斟酌理本燮調化源疇咨僉同夢卜斯  
協命爾予翼倚爲股肱登于黃樞參我大政爾當一  
乃心志罄貫忠貞澄清品流旌別淑慝俾四夷左袵  
咸寧吾教侯伯卿士各稱厥官罔曰難理惟其至公  
罔曰弗能惟其悉力欽哉戒哉無忝前良可門下侍  
郎平章事

九月以刑部侍郎舒元與本官平章事以兵部郎中  
知制誥翰林學士李訓爲禮部侍郎平章事

十一月詔曰朕嗣守丕圖務弘至理憂勤是切宵旰  
靡遑所以庶政萬機悉委丞相乃者失于任使妖沴  
遽生方思正人叅我大柄銀青光祿大夫守尚書右  
僕射上柱國榮陽郡開國公食邑三千戶鄭覃天資  
直氣嶽降上才性惟端莊道本孤峻文含風雅學專  
儒玄通古今理亂之源達教化損益之要歷踐華貫  
周旋大僚休問彰於縉紳故事滿於臺閣載居講度  
密勿內庭曾襟洞開肝膈無隱嘗奏讜議發言有先



見之明每勵貞觀勇退守特立之節泊擢膺揆務總  
 領庶官堅操不回墜典咸舉盡瘁憂國竭忠戴君必  
 能毗予一人康濟四海雅正之路既別清濁之流自  
 分於戲秉茲鈞衡委乃髦碩爾其使萬事得其序百  
 官得其人用賢罔不精立法罔不慎弼亮刑政燮和  
 陰陽其聽朕言往踐厥位克紹先德巖廊有光可本  
 官平章事

初覃為翰林侍講學士每入見必以厚風俗黜朋比再三為帝言之終以為相又

詔曰朕嗣位君臨精求至道日慎一日于今十年期  
 輔佐之臣為我至理中立匪懈知無不為今得其人  
 果副僉屬朝議郎尚書戶部侍郎判官度支上柱國

賜紫金魚袋李石操履堅貞志業弘茂性合道要  
 通化源屢佐藩方備開勲績用司夕拜之任旋知尹  
 正之榮爰委財征籌宣成效是宜擢膺輔弼俾勵正  
 能爾當勤成務之規率致君之道內貞百度外靖四  
 方參毗萬機課程庶績盡匪懈之節竭宣力之能大  
 振朝綱兼司國計致億兆之庶富成方夏之又安副  
 予知臣勉茂休烈可守本官平章事仍依前判度支  
 開成二年四月詔曰王者任賢能所以緝熙庶績舉  
 正直期乎獻可弼違苟非懋茲四德何以光膺大任  
 翰林學士將仕郎守尚書工部侍郎知制誥兼皇太



子侍讀上騎都尉賜紫金魚袋陳夷行元精降靈厚  
載儲祉聚蓄英粹作時休祥懷道清貞執德謙茂行  
高嵩華弘苞容之偉量明洞水鏡韜妍媸於默識貞  
已滋潔遇物能容雖墻岸孤峻而襟抱夷曠孝友爲  
脩已之具文學職潤身之餘衆推全才時號端士頃  
在郎署雅有名稱是用擢居禁密禪輔導元良論辨  
見賢人之業教諭得名臣之體星官屢改才術彌彰  
古稱旁求於夢卜曷若選之於言行是用付以政柄  
登于台階任茲鈞衡之重處以臯夔之秩人所注意  
予將仰成勉陳啓沃之術以副具瞻之望可守本官

平章事

三年正月制曰運行帝載翊贊天工必俟輔臣以宣  
至化將益秉鈞之重是茲竝命之求諸道鹽鐵轉運  
等使正議大夫守戶部尚書上柱國弘農郡開國伯  
食邑七百戶賜紫金魚袋楊嗣復動必居正言惟在  
公峻若孤山清猶止水從政稟詩書之教承家建禮  
樂之源朝議郎守尚書戶部侍郎判戶部事上柱國  
賜紫金魚袋李玨質本溫明才推俊茂智能周物弘  
本能容非守和有君子之儒可大見賢人之業挺爲  
國傑秀稟元精生必爲時寶稱希代便蕃清秩操履



有嘗調黃鍾而協諧和朱絃而疏越或總戎重鎮或  
敷惠字人卒乘有緝時之功學婆著昭蘇之詠洎入  
司邦賦爰掌版圖事未成財公望猶鬱是可以宰領  
樞務用弼予違敘彝倫而建大中罄計謀而調元氣  
又寧華夏保合神人宜申補袞之規致我垂衣之理  
於戲孔明相鼎峙之國尚聞魚水之詞夷吾輔霸業  
之君猶致鴻翼之諭矧予祇荷丕構雖未克前修造  
次之間而不忘遵道宵衣旰食一紀于茲災沴尚生  
於旱蝗黎元屢困於衣食中夜靜慮若涉大川將求  
津涯俟爾而濟爾謂是靡以拂吾心而不行爾謂是

靡以徇吾志而苟用開物成務俾又於得時求賢審  
官寧我以多士則魚水鴻翼夫何足言勉副簡求無  
忝我休命嗣復可守本官平章事依前充諸道鹽鐵  
轉運使珽可本官平章事依前判戶部  
十二月詔曰緝熙柄政亮采皇猷弘道德而輔昌圖  
調陰陽而平景緯我唯求舊人亦與能正位台階實  
資元老河東節度觀察處置等使開府儀同三司守  
司徒兼中書令大原尹北都留守上柱國晉國公食  
邑三千戶實封三百戶裴度星辰稟秀山嶽炳靈文  
蔚采章量包江海負經邦之遠畧懷許國之明誠研



幾而識洞著龜運籌而道光竹帛風雨一致儀刑四  
朝萬方所瞻百辟爲憲洎揚旌馮塞建飾龍山謹管  
籥而戎塞烟清壯襟帶而軍牙氣肅虜絕南牧聲雄  
北門懿茲殊庸予所嘉歎是用專授衡軸俾清化源  
統和神人茂育區夏夫宰相之任作予股肱外可以  
懷柔四夷內可以親附百姓大可以贊亭毒阜生成  
小可以激貪廉正雅俗爾其休躅予不重言至於玉  
立巖廊風行號令端若植表爲時指南開予冑襟廣  
我視聽實賴人傑代茲天工爰罷麾幢再操舟楫庶  
展乞言之禮豈唯論道之尊佇竭訃謀無忝毗倚可

守司徒兼中書令

武宗開成五年正月卽位二月制曰朕丕承寶圖思  
臻理古小大之政皆依輔臣選衆攸難得人而授中  
大夫守太嘗卿上柱國賜紫金魚袋崔鄆天資正性  
嶽降懷財慎楊震之四知邁臯陶之九德抱負直質  
秀發英華動必蹈中言皆體要聚學每探於精贖馳  
騁九流摛文若奏乎笙簧擢揚三代鴻量難挹懿聲  
自高乃者入典訓詞出司俊造能用周密靡混妍媸  
銓總以明允爲先廉察以澄清爲重嘗踐其職顯有  
休功秩宗之選方澄公台之論彌鬱繇是酌其望實



付以鈞衡恢予之規模廣予之耳目於戲宰相之任  
弼諧是資予欲使六氣均調惟爾贊予欲使萬方平  
又惟爾謨予欲使臣寮得職惟爾諧予欲使邪正不  
亂唯爾翼予言罔慮於拂耳進無忘于沃心貞觀開  
元之法度具存房魏姚宋之規猷盡在咨爾丞相舉  
而行之可守本官平章事又以戶部尚書判度支崔  
珙守本官平章事

九月以淮南節度簡較左僕射李德裕為吏部尚書  
平章事

會昌元年二月以淮南節度使簡較吏部尚書李紳

為中書侍郎平章事

四年六月以淮南節度使簡較司空杜悰為右僕射  
兼門下侍郎平章事仍判度支充鹽鐵轉運等使  
八月以兵部侍郎翰林學士承旨崔玄為中書侍郎  
平章事

五年三月以御史中丞兼兵部侍郎李回守本官平  
章事

五月以戶部侍郎崔元式平章事是歲李讓夷平章  
事又以兵部尚書鄭肅本官平章事

本紀簡拜  
相月不獲

宣宗以會昌六年三月即位四月以兵部侍郎翰林



學士承旨白敏中守本官平章事

五月以劔南東川節度使簡較戶部尚書盧商為兵

部侍郎平章事

六月以戶部尚書諸道鹽鐵轉運使馬植守本官平

章事

大中元年七月以戶部侍郎翰林學士承旨韋琮守

本官平章事

二年三月以禮部尚書諸道鹽鐵使馬植兵部侍郎

判度支周墀並守本官平章事

十一月以戶部侍郎判度支崔龜從守本官平章事

三年四月以御史大夫崔章為中書侍郎兵部侍郎

判戶部事魏扶守本官並平章事

四年十一月以戶部侍郎判本司事魏謩守本官平

章事

六年四月以禮部尚書諸道鹽鐵轉運等使裴休守

本官平章事

七年四月以御史大夫鄭朗為中書侍郎平章事

十一月以戶部侍郎判本司事令狐絢為兵部侍郎

平章事

十一年正月以工部尚書崔慎繇為中書侍郎平章



事

六月以兵部侍郎判度支蕭鄴守本官平章事

十二年正月以戶部侍郎判度支劉瑒守本官平章

事

五月以兵部侍郎諸道鹽鐵轉運等使夏侯孜守本

官平章事

十三年四月以翰林學士承旨兵部侍郎蔣伸等守

本官平章事

懿宗咸通元年二月以河中節度使杜審權爲兵部

侍郎判度支尋守本官平章事以右僕射諸道鹽鐵

轉運等使杜悰平章事

二年九月以前兵部侍郎判度支畢誠爲工部侍郎

平章事

四年三月以兵部侍郎判度支楊牧守本官平章事

十一月以兵部侍郎判度支曹確守本官平章事又

以兵部侍郎高瓌守本官平章事

五年十一月以兵部侍郎蕭寘守本官平章事

六年二月以御史大夫徐商爲兵部侍郎平章事

七年十一月以翰林學士承旨戶部侍郎路巖爲兵

部侍郎平章事



八年三月以兵部侍郎于棕等守本官平章事

十年正月以翰林學士戶部侍郎劉瞻守本官平章

事

十一年正月以翰林學士丞旨兵部侍郎駙馬都尉  
韋保衡守本官平章事

十一月以禮部尚書王鐸守本官平章事

十三年正月以禮部侍郎判度支劉鄴守本官平章  
事二月以御史丞趙隱爲戶部侍郎平章事

十四年四月以吏部侍郎蕭倣爲兵部侍郎平章事

僖宗乾符元年四月以兵部侍郎諸道鹽鐵轉運等

使崔彥昭守本官平章事

五月以吏部侍郎鄭備爲兵部侍郎翰林學士戶部  
侍郎盧攜守本官平章事

二年十一月以左僕射王鐸兼門下侍郎平章事

三年二月太嘗卿李蔚守本官平章事

五年九月以吏部尚書鄭從謙守本官平章事

六年四月以兵部侍郎崔沆爲吏部侍郎戶部侍郎  
翰林學士豆盧瑑守本官並平章事

十二月以太子賓客分司盧攜爲兵部侍郎平章事  
廣明元年十一月以戶部侍郎翰林學士王徽裴徽



命相四  
竝守本官平章事

中和元年正月

車駕在興元

以翰林學士丞旨尚書戶部

侍郎蕭邁為兵部侍郎平章事

三月

車駕在城都

以鳳翔節度使鄭政為司空兼門下侍

郎平章事

七月以兵部侍郎判度支韋昭守本官平章事

四年四月以兵部侍郎判度支鄭昌圖守本官平章事

光啓二年三月以翰林學士丞旨工部尚書杜讓能為刑部尚書御史大夫孔緯為兵部侍郎竝平章事

三年正月以兵部侍郎諸道租庸使張濬守本官平章事

昭宗龍紀元年正月以翰林學士丞旨兵部侍郎劉崇望守本官平章事

大順元年十二月以翰林學士丞旨兵部侍郎崔紹緯守本官御史中丞徐彥昭為戶部侍郎竝平章事  
二年十二月以戶部尚書鄭延昌為中書侍郎平章事判度支

景福二年十一月以新除鳳翔節度使徐彥若復知政事戶部侍郎判戶部事王搏本官平章事



乾寧元年十月以翰林學士丞旨禮部尚書李璣為

中書侍郎平章事宣制之日兵部郎中知制誥劉重

省不可居輔弼之地繇是制命不行

是月以御史中丞崔商為兵部侍郎平章事

二年六月以太子賓客孔緯為吏部尚書尋加守司

空門下侍郎平章事緯時在華州屬太原李克用軍

至而止以湖廣節度使王搏為中書侍郎平章事

三年七月翰林學士丞旨尚書左丞陸展為戶部侍

郎平章事

八月新除鎮東軍節度使王搏復知政事以京兆尹

孫偓為兵部侍郎平章事

四年二月以右散騎嘗侍鄭榮為禮部侍郎平章事

五月以國子毛詩博士朱朴為右諫議大夫平章事

光化元年正月車駕在華州以兵部侍郎崔遠為戶部侍

郎平章事

二年正月以兵部尚書陸扆為兵部侍郎平章事

三年九月以刑部尚書裴贄為中書侍郎兼刑部尚

書以吏部侍郎裴樞為中書侍郎並平章事

天復二年十二月以禮部侍郎獨孤損為兵部侍郎

平章事



三年正月車駕自鳳翔還京工部尚書崔裔率百官  
迎謁即日降制以裔為守司徒兼門下侍郎平章事  
二月以新除廣南節度使裴樞為門下侍郎兼吏部  
尚書以戶部侍郎王搏守本官並平章事

十二月以禮部尚書獨孤損為中書侍郎平章事

天祐元年正月以翰林學士左拾遺柳璨為右諫議

大夫以兵部尚書崔遠為中書侍郎並平章事

哀帝即位踰年不改元仍號天祐二年二月以吏部

侍郎張文蔚尚書左丞楊涉並為中書侍郎平章事

後唐莊宗同光元年四月即位于魏是月以行臺左

丞相豆盧革為門下侍郎平章事太清宮使以行臺

右丞相盧程為中書侍郎平章事修國史時帝將行册禮簡求

輔相詢于盧質對曰若以本朝士族取人則無踰定册節度判官豆盧革河東觀察判官盧程帝因詔赴

行臺為右丞相至是改為行臺之命

十一月以尚書左丞趙光裔為中書侍郎以尚書禮

部侍郎韋說守本官並平章事時盧程以狂妄免郭崇韜自勳臣拜議者

以為國朝典禮故實須訪前代名家成法光裔有宰

相器初薛廷珪李瑱當武皇為晉王時常因為册使

至太原故皆有夙望咸謂宜處台司崇韜採言事者

陸廷珪朽老浮華無相業瑒雖文學高傾險無士風

皆不可相乃用光裔與韋說同制  
明宗天成元年五月制曰欲運陰陽賢者諒資於籌



畫將烹鼎飪哲王取喻于鹽梅是知心恬淡則燮理無差意平正則調和靡慝王者以二儀爲法百度是貞將施理國之規必慎代天之任其有鎮時望重濟物才高或早推房杜之風或暗合孫吳之略咸膺妙選適副旁求光祿大夫太子賓客上柱國滎陽郡開國侯食邑一千戶鄭珏禮樂成家鈞台接武珪璧耀無瑕之彩咸韶奏治代之音雅度不群貞規拔俗爲縉紳之楷範作文學之宗師歷踐華資嘗居重任舒卷罔渝于古道坦夷不易于冲襟允謂正人實符休運正議大夫守工部尚書上柱國樂安縣開國男食

邑三百戶賜紫金魚袋任圜儒玄繼代簪組傳芳蘊穰苴文武之才抱季子縱橫之略早叅戎幕旣備展於良謀洎歷尹京復廣敷于善政掩李牧防虞之術繼蕭何饋運之勞安北邊而顯賴殊功代西蜀而固資婉畫及康延孝忽從劒閣欲襲錦川統戎至及于二千破賊將踰于萬數奸兇盡戮邛蜀再寧靜十道之妖氛息三川之生聚遠提銳旅來赴上京適當纂紹之初尤驗忠貞之節而鬱于人望協彼僉諧宥膺竝命之榮允謂當仁之選或升書殿或掌國租冀伸致王之嘉猷別展富民之茂績於戲位尊百辟職總



萬機公忠則庶政惟和便辟則彝倫攸斃慎宣九德  
 勉阜群生珏可中書侍郎兼刑部尚書平章事集賢  
 殿大學士園可金紫光祿大夫中書侍郎兼工部尚  
 書平章事判三司時帝初即位園自蜀至安重誨不  
 欲獨拜宰相共議朝望一人共之  
 孔循言珏貞明時久在中書性畏慎而長者  
 美詞翰好人物重誨即奏與園並命為相

二年正月制曰昔舜命皋夔百揆時敘湯命仲虺萬  
 國咸寧道既合于君臣事實光于今古朕克相上帝  
 敷佑下民惟順考于典墳俾旁求于彥傑升之廊廟  
 付以鈞衡期共治于寰區冀永康於黎庶厥有明哲  
 咸謂碩儒早隆佐命之功久負濟時之器必使膺茲

大任弼我不基既詢謀以僉同固朕志而先定爰行  
 竝命是降寵靈端明殿學士朝議大夫守尚書兵部  
 侍郎上柱國賜紫金魚袋馮道四瀆凝休五行鍾秀  
 積善克承于家訓揚名端守于素風孔門魯顏寧同  
 懿行漢庭嚴樂詎比宏才溫恭為君子之儒慤厚有  
 大臣之體故自從龍契會倚馬摘詞首贊先朝紹隆  
 丕業為善不伐有能不矜守廉貧則罔恥緼袍持慎  
 審則靡言溫樹自予纂嗣賴爾弼違爰精選于禁林  
 乃特遷于祕殿愈陳規誠屢罄論思都正直以莫倫  
 諒真純而罕匹銀青光祿大夫守太嘗卿判吏部尚



書銓事上柱國崔協星辰降彩軒冕聯榮禮樂稟于  
生知詩書博于時習輝華繼世可鄙荀陳清貴傳家  
固超王謝自登高第踐歷周行居省闈則職業備脩  
升憲府則朝綱克振近者委司選部命典秩宗轄彼  
銓衡則群才適序調其律呂則雅音克諧既揚正始  
之風可驗中和之德竝以功庸夙著問望彌高宜允  
副于具瞻俾顯當于爰立是命寵升黃閣光弼紫宸  
或居書殿之榮俱列戶封之貴仍加峻級以示新恩  
道既叶于咨詢心乃符于啓沃於戲知人則哲予竊  
慕于前王事君盡忠爾已聞於當代更宜夙夜慎保

初終使社稷以無憂期子孫之有賴往踐厥位汝惟

戒哉道可正議大夫中書侍郎平章事充集賢殿學

士協可中書侍郎平章事初豆盧革幸說得罪執政

言事者衆咸以孔循少侍宮禁諸故實知朝廷人士  
之才行安重誨多聽之循意不欲河朔人居相位初  
已援引鄭珏入中書至是任圜欲相李龍而鄭珏與  
珏梁時同在翰林為學士二人不相善居珏切齒孔  
循既以珏為門人亦排斥李琪謂重誨曰李琪非無  
藝學但不廉耳宰相人士之表儀但得真端有器度  
足以輔弼矣朝論所與莫若崔協重誨以為然後重  
誨內殿中書闕人欲擇丞相而帝曰誰可相者乃以  
崔協對任圜曰重誨未諳朝中人物被人欺賣如崔  
協者天下皆知少識文字時人呼為無字碑臣以陛  
下藩邸之年即回天曉無才幸進比不知書一旦驟  
塵輔弼終朝若負芒刺以臣一人取笑足矣何容中  
書之內更益笑端帝曰宰相重位卿等更自詳審然  
吾在藩時識易州刺史韋肅人言名家待我嘗厚置



于此位如何以蕭苟未可則馮書記先朝判官稱為長者多才博學與物無競可以相矣書記即馮道也嘗為莊宗霸府書記帝素款顏偶不記名但云書記朝退宰臣樞密使休于中與殿廊舍孔循不揖拂衣徑去曰天下事一則任園園乃向者崔協暴死則已不死會居此位重誨私謂園曰今正闕人協空備員可乎園公言何俠哉今朝廷有李琪者學際天人奕葉軒冕論才技藝可敵時輩百人而讒夫巧辨忌害其能必舍琪而相協何棄蘇合之丸取蝮蟻之轉也重誨笑而止然與循同職循曰言琪之短知協之長月餘乃下此制物論醜之

三年三月癸亥以成德軍節度使王建立為簡較太尉尚書右僕射同中書門下平章事充集賢殿大學士判三司事

長興二年三月制曰衡之平不欺于物水之止洞鑑

于形厥有操心秤而無撓重輕掛人鏡而自分妍醜所以旁求多士果得正人符夢卜而惟吉之從舉賢良而不仁者遠命為余弼僉曰汝諧朝議大夫守太嘗卿上柱國隴西縣開國男食邑三百戶賜紫金魚袋李愚勁草凌風孤松抱雪向歷艱難之運再逢開泰之期先皇帝擢在禁林輟隨証飾鋒鏑翰墨經劔閣而無兢刊銘糞土珠金入刀州而未嘗關夢罔矜諭蜀素蘊致堯洎朕續紹丕圖服勤內署慎密而不言溫樹論思而守奉甘泉及掌文闈大開公道樹杏壇而重興四教歷蘭省而再陟二卿當祀周郊密承



殷誥泥金而將期獻頌擎石而尋致來儀既歷試諸  
艱且爰立作相是命亞鳳池之貴位領虎殿之群儒  
仍進崇階兼加好爵於戲久虛右席俾運前籌期偃  
戢於干戈致混同于書軌以毗乃辟正事惟醇則霖  
雨鹽梅于是乎在可正議大夫守中書侍郎平章事  
集賢殿大學士

四年正月制曰端明殿學士正議大夫尚書兵部侍  
郎柱國彭城縣開國男食邑三百戶賜紫金魚袋劉  
昫可中書侍郎平章事

四月制曰朕聞燮理陰陽霖雨之功是託調和鼎鼐

鹽梅之味攸憑蓋貞淳則克契二儀正直則允諧庶  
品必在懸衡秉志定鏡操心苟無爽于毫釐則潛符  
于造化將付代天之柄宜歸不世之才今得良臣庶  
臻治道端明殿學士中大夫尚書兵部侍郎上柱國  
賜紫金魚袋趙鳳丹山瑞彩赤墜靈鋒清明猶水鏡  
冰壺質厚若渾金璞玉動惟稽古靜可鎮時夢傳五  
色之毫文章煥爛力就三冬之志學藝縱橫頃在禁  
林嘗傳職業始中原之大定屬萬國以來朝制命聯  
綿詔書疊委共歎立成之敏略無停綴之時洎朕承  
基復資演誥俄遷居于祕殿嘗密贊于鴻圖實賴謀



猷每嘉經濟爰司貢部俾選儒徒果無遺逸之名足見搜羅之道昨朕將還雒邑特委浚郊一時權籍于殿邦朞月尋聞于報政恩威竝設賞罰皆明夷門無夜柝之喧梁苑遂春臺之樂克膺重寄允謂周才安顯處于巖廊貴大施于陶冶黃扉峻秩粉署崇資兼煩筆削之功更代簡編之職勲階竝進爵邑惟新足為爰立之榮在體勤求之意唯思啓沃端俟弼諧於戲應卜夢之祥當股肱之任關群生之休戚繫萬宇之安危社稷是平寰瀛繫賴勉勤夙夜無怠初終勿令伊說臯夔咸擅美于前也可正議大夫門下侍郎兼

工部尚書同平章事監修國史上柱國仍封天水縣開國男食邑三百戶

末帝清泰元年七月以簡較戶部尚書守太常卿盧

文紀為中書侍郎平章事

帝素不悅馮道以奉山陵出鎮而用李有劉昫則

大察而寡合其則氣剛而性褊每于議論動必相違所以恩澤稽留庶事停壅帝頗患之切擇輔臣採之于人又疑而未決乃書作相姓名置琉璃器中一夜燃香視星辰清早以箸夾之首得文紀名故命之

八月以尚書左丞姚顛為中書侍郎平章事

十二月以秦州節度使張延朗為中書侍郎平章事

三年三月以翰林學士禮部侍郎馬胤孫為中書侍

郎平章事

初帝為潞王鎮河中時胤孫為記室留守西京節度鳳翔累轉觀察判官及即位用



為翰林學士戶部郎中知制誥賜紫金魚未滿歲改  
中書舍人禮部侍郎皆帶禁職時藩邸舊臣韓昭胤  
房曷為樞密使劉延節李專美為宣徽使河南尹雍  
王重美不平之密奏曰馬胤孫者只令視草恐未符  
室帝然之尋拜中  
書侍郎平章事

晉高祖天福元年閏十一月制曰天有寶圖應運者  
文明之主國調金鉉入司者經緯之臣將冀大同須  
資良弼况謂建邦之始難虞納揆之官其有霸府舊  
僚前籌上密歷歲寒而斯久弘益嘗多經艱險而不  
渝忠貞彌篤式旌懿德宜舉徽章乃擇吉辰爰行竝  
命翰林學士承旨知河東軍府事正議大夫尚書戶  
部侍郎知制誥賜紫金魚袋趙瑩儒中端上席上正

人襟靈而萬里坦夷行葉而四時繁茂洎陞簪履旦  
夕之婉畫喧人每侍籌帷遐邇之折衝在我翰林學  
士權知樞密使事正議大夫尚書禮部侍郎知制誥  
賜紫金魚袋桑維翰文場翹楚學海波瀾撓澄不變  
予二風躁靜同歸于一德誠抱兼人之器諒懷經國  
之才十年伸揮翰之勞數鎮有從征之役而皆功參  
佐命績顯坐籌蕭曹遠接于英猷房杜近齊於芳烈  
成予丕業職爾元勳既協良辰難稽懋賞自董戎而  
居廊廟繇內翰而秉鈞衡乃用器能佇觀燮贊於戲  
優賢異典有國斯恩勉伸禪救之謀其致升平之治



事繁罔避言直勿辭永修魚水之觀以保雲龍之契  
瑩可紫金光祿大夫門下侍郎平章事集賢殿大學  
士依前權知樞密使事

十二月制曰舜任五臣坐致穆清之化漢尊三傑克  
成王霸之基皆所以君臣義通上下情洽得以寅亮  
大化遵揚休聲百工允釐垂衣裳而御宇萬方率服  
鑄劍戟以爲農式繇輔弼之功兆此隆平之運朕謬  
膺開創初統寰瀛炤臨將被於淳風宰制實憑於良  
輔其有功宣締構業紹經綸兩朝翰翮戴之勲萬彙  
仰陶鈞之力是宜重膺夢卜再踐廟堂俾光新造之

邦共闡無爲之化經邦致理翊戴功臣特進守司空  
上柱國始平郡公食邑二千五百戶食實封三百戶  
馮道禮天蒼壁鎮國元龜夏璜爲稀世之珍軒鏡是  
辟邪之寶方諸才業良平有可差其肩較彼忠貞姚  
宋不得並其轡可謂人臣之刀尺造化之丹青自明  
宗皇帝克紹基扃仰膺圖讖於草昧皇靈之際有攀  
鱗附翼之功密贊皇猷靜司帝誥出納奉命周旋八  
平持葛秤以定錙銖浮殷舟而拯沉溺四時成歲陰  
陽畢順於調燮九德不愆朝野咸推於表式繫於薄  
德獲彼寵靈將惕勵以爲懷恐負荷之弗克宜憑勲



德共濟艱難是用重啓巖廊俾持埏埴水土之崇資  
不改弘文之大柄仍兼於戲造膝陳謀爾無辭於俾  
救開懷納諫朕不怠於聽從致社稷於昌期納生靈  
於壽域其臻至理勿墜前功唯于大臣不俟多訓可  
守司空兼門下侍郎平章事弘文館太學士

三年正月以兵部侍郎判戶部李崧為中書侍郎平  
章事充樞密使

五年八月以翰林學士丞旨戶部侍郎和凝為中書  
侍郎平章事

漢高祖以開運四年二月即位稱天福十三年四月  
以河東節度判官蘇逢吉觀察判官蘇禹圭竝為中  
書侍郎平章事

九月以吏部尚書竇貞固為司空兼門下侍郎平章  
事弘文館太學士以翰林學士行中書舍人李燾為  
中書侍郎兼戶部尚書平章事

高祖有相燾意燾未拜前一日欲言事請見高祖召與語燾曰國家新造丕圖內外藩輔並宜得人苟非其人無益招患今相輔位缺未審陛下欲命何人高祖曰竇貞固問其次曰李燾燾恐悚謝曰臣器狹性忠憂時過當輒有僭越敷奏然臣才薄地卑無輔弼之望幸勿以臣汚制書翌日制出拜平章事

周太祖廣順元年正月即位以前太師齊國公馮道為中書令弘文館太學士



六月以樞密使王峻爲左僕射兼門下侍郎平章事  
監脩國史充樞密使以樞密副使兵部侍郎范質爲  
中書侍郎平章事以戶部侍郎判三司李谷爲中書  
侍郎平章事判三司

顯德元年正月制曰鴻遇順風比事者美良賢之任  
鵬征積水寓言者伸遠大之圖位非才而不居才非  
位而不展兩端相叩庶績方凝爰升佐命之臣以授  
調元之職端明殿學士通議大夫尚書戶部侍郎上  
柱國太原縣開國男食邑三百戶賜紫金魚袋王溥  
智出於衆行高於人茂學懿文而策名長才廣度以

成器始歸霸府當效折衝洎叨造邦尋參宥密摘紫  
林之詞翰伸祕殿之論思履順持謙奉公處正紫宸  
三接在注意以方深黃閣九遷諒登庸而允協俾宣  
相業共贊皇猷食邑贈封功臣改號仍進階資之貴  
俱爲輔弼之光爾其師克儉於焚機繼在公於補袞  
止辭而出奉義而行將聯賡載之歌長保虔恭之位  
佩服茲訓式昭德音可紫金光祿大夫中書侍郎平  
章事

世宗以是月丙申卽位七月癸巳制曰朕自履宸極  
思平泰階出一令慮下民之未從行一事懼上玄之



罔祐晨興夕惕終歲于茲雖禮讓漸聞興行而風雨未之咸若豈刑政之斯闕而德教之未敷哉繇是進用良臣輔宣元化雖朕志先定亦輿情具瞻爰擇嘉辰誕敷明命樞密院直學士中大夫尚書工部侍郎上柱國晉陽縣開國男食邑三百戶賜紫金魚袋景範昔佐先帝每罄嘉謨建事眇躬愈傾忠節奉上得大臣之體簡身爲君子之儒一昨戎輅親征皇都是守贊勲賢於留府副徵發於行營軍政所資國用無闕今則靈臺偃革宣室圖功思先朝欲用之言成聖考得賢之美俾參大政仍掌利權爾其明聽朕言往敷玄化予欲則垂象而清品彙爾則順天道以序彝倫余欲恤刑名而息戰爭爾則謹憲章而恢廟畧天人之際懸合軍民之事罔渝則國相之尊非爾孰處邦計之重惟才是藏勉思倜儻以致君勿效因循而保立佇聞成績用副虛懷可正議大夫中書侍郎平章事判三司

冊府元龜

冊府元龜

帝王部

卷之七十四



冊府元龜

淮南李嗣京參門

西極文翔鳳訂三

豫章黃國琦較釋

帝王部 七十五

任賢

夫致千里者必資乎絕足構廣廈者必擇乎宏材是知端袞嚮明財成萬務致治之具非賢罔濟其親信也喻之心膂其委仗也譬之翰翮及有德冠群萃才惟俊傑智謀可以備贊佐操履可以著表式忠勇質



直各負其能或素聞名稱待以不次或因緣彙薦任其所長察言觀行罔有虛授小大之器咸適厥用繇是尊爵以榮之厚祿以寵之推心責成周旋是賴書曰任賢勿二不亦宜乎

黃帝舉風后力牧嘗先大鴻風后黃帝三公也力牧黃帝相也大鴻見封禪

書以治民順天地之紀幽明之占死生之說一云幽明之數

合死生之說存亡之難時播百穀時是也草木敦化鳥獸蟲

蠖旁羅日月星辰水波一作沃土石金玉勞勤心力耳

日節用水火財物有土德之瑞

堯命羲和欽若昊天曆象日月星辰敬授人時重黎之後

羲和氏世掌天地四時之官故堯命之使敬順昊天言元氣廣大星四方中星辰日月所會曆象其分

節敬致天時以授人也分命羲仲宅嵎夷曰暘谷嵎夷居

也東表之地稱嵎夷也暘明也日出於谷而天下明寅

故稱暘谷暘谷嵎夷一也羲仲居治東方之官寅敬賓導秩序也歲起於東而始

賓出日平秩東作寅敬賓導秩序也歲起於東而始

日平均次序東作日中星鳥以殷仲春日中謂春分之日鳥南方

朱鳥七宿殷正也春分之昏鳥星畢見厥民析鳥獸

孳尾冬寒無事並入室處奉事既起丁壯就功厥申

命羲叔宅南交申重也南交言夏與春交舉一平秩

南訛敬致訛化也掌夏之官平序南方化育之事故

日永星火以正仲夏永長也謂夏至之日火蒼龍之



夏之氣節季孟亦可知厥民因鳥獸希革因謂老弱因就在田

時鳥獸毛羽希少革易革故也分命和仲宅西曰昧谷昧實也日入

賓故曰昧谷昧谷曰西則夷嶠東可寅餞納日平秩

西成餞送也日出言導日入言送因事之宜宵中星

虛以殷仲秋宵夜也春言日秋言夜互相備虛玄武

秋厥民夷鳥獸毛毳夷平也老壯在田與夏平申命

和叔宅朔方曰幽都平在朔易此稱朔亦稱方言一

幽南稱明從可知也都謂所聚也易謂歲改易於北

方平均在察其政以順天嘗上德言義和敬順昊天

北方別仲叔日短星昴以正仲冬日短冬至之日昴

各有所掌厥民隩鳥獸氄毛隩室也民改歲入此

七星並見以帝曰咨汝羲暨和期三百有六句有六

日以閏月定四時成歲咨嗟暨與也匝四時日期一

六十日除小月欠六日一歲十二月月三十日正三百

一月則置閏焉以定四時之節氣成一歲之曆象

允釐百工庶績咸熙允信釐汙工官績成咸皆熙廣

事則能信治百官帝舜時高陽氏有才子八人高陽帝顓頊之蒼舒瞿

歡擣鼗大臨靡降庭堅仲容叔達此卽重益禹臯陶

字齊聖廣淵明允篤誠天下之民謂之八愷齊衆也

允信也篤厚高辛氏有才子八人高辛帝嚳之號伯

也凱和也奮仲堪叔獻季仲伯虎仲熊叔豹季狸此卽稷契朱



忠肅共懿宣慈惠和天下之民謂之八元肅敬也懿美也宣德編也元此十六族世濟其美不隕其名濟成也隕墜也以至

於堯堯不能舉舜臣堯舉八愷使主后土后土地官禹作司空平水土即揆度也以揆百事莫不時序地平天成成平也舉

八元使布五教于四方契作司徒五教在寬故知契在八元之中父義母慈兄友弟恭子孝内平外成

禹任臯陶以政而卒復舉益任之政

周武王即位以太公望為師周公為輔召公畢公之

徒左右王師脩文王緒業

穆王即位時王道衰微穆王閱文武之道缺乃命伯

冏申戒太僕國之政作冏命復寧

漢高祖初為漢王時陳平因魏無知求見拜為都尉

使參乘典護軍絳灌等或讒平曰絳灌嬰也平雖

美丈夫如冠玉耳其中未必有也飭冠以玉光好外見中非所有也

聞平居家時盜其嫂盜猶私也事魏王不容亡而歸楚不

中又亡歸漢今大王尊官之令護軍臣聞平使諸將

金多者得善處金少者得惡處平反覆亂臣也願王

察之漢王疑之以讓無知問曰有之乎無知曰有漢

王曰公言其賢人何也對曰臣之所言者能也陛下

所問者行也今有尾生孝已之行孝已宗宗之子有孝行尾生古之信



士一而無益於勝敗之數陛下何暇用之乎今楚漢

相距進奇謀之士顧其計誠足以利國家耳顧念也盜

嫂受金又安足疑乎漢王召平而問曰吾聞先生事

魏不遂事楚而去遂循今又從吾遊信者固多心乎

平曰臣事魏王魏王不能用臣說故去事項王項王

不信人其所任愛非諸項即妻之昆弟雖有奇士不

能用臣居楚聞漢王之能用人故歸大王羸身來不

受金無以為資臣計畫有可采者願大王之使無可

用者大王所賜金具在請封輸官得請骸骨漢王乃

附厚賜拜以為護軍中尉盡護諸將乃不敢復言

張良封留侯初良多病未嘗持兵將嘗為畫策何時為未

高祖擊伐出奇計下馬邑及立蕭相國國良勸高祖

立所與從容言天下事甚眾

田叔為趙王侍中趙相貫高等謀逆發覺逮捕高等

併捕趙王赦下獄詔敢有隨王罪三族叔與孟舒等

十人自髡鉗為王家奴從王就獄王實不知其謀王

得出高祖賢趙臣田叔孟舒等十人召見與語漢庭

臣無能出其右者高祖說盡拜為郡守諸侯相

文帝時張釋之為謁者既朝畢因前言便宜事文帝

曰卑之無甚高論令今可行也令其議論依於是釋

附時是也



之言秦漢之間事秦所以失漢所以興者帝稱善拜  
釋之為謁者僕射帝幸虎圈就車召釋之驂乘徐行  
行問釋之秦之弊行問且行且問也具以質言質誠也至宮帝  
拜釋之為公車令

武帝舉賢良對策百餘人帝善嚴助對擢為中大夫  
後得朱買臣吾丘壽王司馬相如王父偃徐樂嚴安  
東方朔枚臯膠倉終軍嚴葱奇等並在左右是時征  
伐四夷開置邊郡軍旅數發內改制度朝廷多事屢  
舉賢良文學之士公孫弘起徒步數年至丞相開東  
閣延賢人與謀議朝覲奏事因言國家便宜帝令助

等與大臣辨論中外相應以義理之文

中謂天子之賓客若嚴助

之輩也外謂公卿大夫也

大臣數誦

謂計議不如助等每誦服也

其尤親幸者

東方朔枚臯嚴助吾丘壽王司馬相如

終軍至長安上書言事

帝異其文拜為謂者給事中

王父偃上書闕下朝奏暮召入奏所言九事其入事  
為律令是時徐樂嚴安亦俱上書言世務書奏帝召  
見三人謂曰公皆安在何相見之晚也言皆若各在何處迺  
拜偃樂安皆為郎中

元帝時蕭望之周堪本以師傅見尊重帝初卽位數  
晏見言治亂陳王事望之選白宗室明經達學散騎



諫大夫劉更生給事中與侍中金敞並拾遺左右四人同心謀議勸導帝以古制多所欲規正帝甚嘉納之

後漢光武初杜林以王莽敗避亂客河西建武六年帝聞林已還三輔乃徵拜侍御史引見問以經書故舊及西州事甚悅之賜車馬衣被群寮知林以名德用甚尊憚之又公孫述既平以程烏李育有才幹擢用之於是西土咸悅莫不歸心焉

虞延為陳留督郵建武二十三年司徒王况辟之時正朝賀光武望而識延遣小黄門馳問之即日拜公

車令

初光武東巡路過小黄詔呼引見問園陵之事延進止從容占拜可觀

第五倫舉孝廉補淮陽國醫工長隨王之國光武召見甚異之建武二十九年從王朝京隨官屬得會見帝問以政事倫因此酌對政道帝大悅明日復特召入與語至夕帝戲謂倫曰聞卿為吏勞婦公不過從兒飲寧有之耶倫對曰臣三娶妻皆無父少遭饑亂實不敢妄過人食

華嶠書曰帝復曰聞卿為市掾人有遺母一筒餅者卿從外來見之

奪毋筭探口中餅信乎倫對曰實無此眾人以臣愚蔽為生是語也帝大笑倫出有詔

以為扶夷長未到官拜會稽太守明帝時東平王蒼上書薦西曹掾吳良帝以示公卿



曰前以事見良鬚髮皓然衣冠甚偉夫薦賢助國宰相之職蕭何舉韓信設壇而拜不復考試今以良爲議郎

朱暉南陽宛人也東平王蒼辟之正月朔旦蒼當入賀故事少府故事給壁是時陰就爲府卿貴驕吏傲不奉法蒼坐朝當漏且盡而求壁不可得顧謂掾屬曰若之何暉望見少府主簿持壁卽往給之曰我數聞壁而未嘗見試請觀之主簿以授暉暉顧召令史奉之奉之主簿大驚遽以白就就更以它壁朝帝聞此之及當幸長安欲嚴宿衛故以暉爲衛士令

和帝時張酺任太尉策免歸里舍謝遣諸生閉門不通賓客左中郎將何敞及言事者多訟酺公忠帝亦推重之永元十五年復拜爲光祿勳

桓帝時周景爲將作大匠及梁冀誅景以故吏免官禁錮朝廷以景素著忠正頃之復引拜尚書令

魏太祖爲丞相時以崔琰爲東曹掾教曰君有伯夷之風史魚之直貪夫慕名而清壯士尚稱而厲斯可以率時者已故授東曹往踐厥職又教曰領長史王必是吾披荆棘時吏也忠能勤事心如鐵石國之良吏蹉跌久未辟之捨騏驥而弗乘焉遑遑而更求哉



故教辟之已置所宜便以領長史統事如故又表辛毗為議郎久之太祖遣都護曹洪平下辨事毗與曹休參之令曰昔高祖貪財好色而良平規其過失今佐治文烈佐治毗字也文烈休字憂不輕矣軍還為丞相長史曹仁為別部司馬數有功拜廣陽太守太祖器其勇畧不使之郡以為議郎督騎

晉武帝時并州刺史王廣言劉宣於帝帝召見嘉其占對因曰吾未見宣言虛耳今見其進止風儀真所謂如圭如璋觀其性質足能撫集本部乃以宣為右部都尉特給赤幢曲蓋蒞官清恪所部懷之

杜預為輕車將軍以罪免時朝廷以預明於籌略匈奴帥劉猛舉兵反自并州西及河東平陽武帝詔預以散侯定計省闕

元帝時諸葛恢為鎮東叅軍與下壺竝以時譽遷從事中郎兼統記室時四方多務牋疏殷積恢斟酌酬答咸稱折中于時王氏為將軍而恢兄弟及顏含竝居顯要劉超以忠謹掌書命時人以帝善任一國之才明帝時阮孚轉吏部尚書領東海王師稱疾不拜詔就家用之尚書令郗鑒以為非禮帝曰就用之誠不快不爾便廢



後魏道武登國十年破慕容寶衆於俘虜之中推其才識者賈夔賈閏晁崇等與參謀議憲章故實

賈夔少有

盛名爲慕容垂昌黎太守及垂遣其太子寶來寇大敗於參合執夔及從兄代郡太守閏等道武卽位拜尚書左丞

參預國政 崔玄伯初爲慕容垂尚書左丞道武之征

慕容寶次於恒山玄伯棄郡東走海濱道武素聞其名遣騎追求執送於軍門引見與語悅之以爲黃門侍郎與張袞對總機要

張蒲初事慕容寶爲平陽河間二郡太守尚書左丞道武定中山寶之官司敘用者多降品秩旣素聞蒲名仍拜爲尚書左丞

明元初卽位詔南平公長孫嵩北新侯安同對理民訟簡賢任能夔倫攸敘

太武時寶瑾爲殿中都官典左右執法帝歎曰古者左賢右戚國之良冊

孝文時王肅自建業來奔是歲太和十七年也帝幸鄴聞肅至虛襟待之因見問故肅辭義敏切辨而有禮孝文甚哀惻之遂語及爲國之道肅陳說治亂音韻雅暢浮會帝旨帝嗟嘆納之促席移景不覺坐之疲淹因言肅氏危滅之兆可乘之機勸帝大舉於是圖南之規轉銳器重禮遇日有加焉親貴舊臣莫能



任賢  
間也或并左右相對談說至夜分不罷肅亦盡忠輸誠無所隱避自謂君臣之際猶玄德孔明也

孝明時辛穆遷中散大夫加龍驤將軍正光四年以老啓求致任引兄謂穆志力尚可除平原相穆撫導民吏懷之

孝莊時辛雄爲尚書左丞詔雄爲關西賞勳大使未行之間會爾朱榮入維及河陰之難潛竄不出帝欲以雄爲尚書門下奏曰辛雄不出存亡未分帝曰寧失亡而用之何失存亡而不用也遂出度支尚書加安南將軍

出帝時崔猷以性鯁直有軍國籌略累遷司徒從事中郎旣遭家難間行入關及謁魏帝哀動左右帝爲之改容目送曰忠孝之道萃此一門卽以本官奏門下事

後周太祖時柳敏初爲河東郡丞及帝克復河東見而器異之乃謂之曰今日甚喜得卿也卽拜丞相府叅軍事俄轉戶曹參軍兼記室每有四方賓客嘗令接之爰及吉凶禮儀亦令監總又與蘇綽等脩撰新制爲朝廷政典遷禮部郎中

唐瑾父永性涉經史容貌甚偉太祖聞其名乃貽永



書曰聞君有二子曰陵從橫多武畧瑾雍容富文雅  
可竝遣入朝孤欲委以文武之任因召拜尚書員外  
郎相府記室叅軍事軍書羽檄瑾多掌之從破沙苑  
戰河橋竝有功封姑臧縣子

隋高祖受禪以蘇威兼納言民部尚書威上表陳讓  
詔曰舟大者任重馬駿者馳遠以卿有兼人之才無  
辭多務也威乃止

許善心初仕陳爲通直散騎嘗侍聘於齊隋遇高祖  
代陳禮成而不獲反命累表請辭帝不許留繫賓館  
及陳亡帝遣使告善心素服號哭於西階之下藉草

東向經三日勅書唁焉明日有詔就館拜通直散騎  
嘗侍賜衣一襲善心哭盡哀入房改服復出北面立  
垂涕再拜受詔明日乃朝伏泣於殿下悲不能興帝  
顧左右曰我平陳國唯獲此人旣能懷其舊君卽是  
我誠臣也勅以本官直門下省賜物千段草馬二十  
匹

煬帝初爲晉王榮毗先爲華州長史時晉王於路次  
密置馬坊毗遏絕其事帝卽位拜治書侍御史帝謂  
之曰今日之舉馬坊之事也無改汝心帝亦敬之毗  
在朝侃然正色爲百寮所憚



帝甚懼長孫無忌曰王珪魏徵往事息隱臣見之若  
讎不謂今者又同此用之何慙往烈然徵不許我爲  
非我所以重之徵再拜曰陛下不導臣使言臣所以  
敢言若陛下不受臣亦何敢犯龍鱗觸忌諱也帝大  
悅夜分乃散各賜錢帛有差

憲宗時武元衡元和二年正月拜門下侍郎平章事  
帝爲太子時知其進退守正及用爲宰相甚禮信之  
呂元膺爲給事中元和四年十月以爲同州刺史入  
謝憲宗問以時政得失元膺奏詞論甚激切帝嘉其

剛正翌日謂宰相曰前日朕問時政得失元膺敢  
言直氣今欲畱在左右使言得失卿等以爲何如李  
藩裴瑄進賀曰陛下納諫超冠前王乃宗社無疆之  
福臣等不能廣求直士又不能數進直言孤負聖心  
合當罪責今請以元膺爲給事中以備顧問帝悅而  
從之

李絳爲翰林學士旣盡心規益憲宗每有詢訪多叶  
事機猶以中人之故出爲戶部侍郎吐突承璀恩寵  
莫二用絳爲宰相前一日出承璀爲淮南監軍翌日  
以絳爲中書侍郎平章事同列李吉甫便僻善逢君



意絳梗直多所規諫故與吉甫大不同時又傳言吉甫通於承瓘故絳尤惡之帝察絳忠直守正自立初任絳論奏多所允從

晉高祖時顏術爲河陽節度副使知州軍以父病棄官而去帝以術在外急於用徵爲文昌正郎樞密學士遣連帥從之術至闕且辭曰臣本書生不通軍術恐不稱其職未知何人悞達陛下必望放臣從其私養之願足矣高祖曰朕自知卿非他人薦也

周世宗時王朴爲左諫議大夫知開封府事初帝以英武自任喜言天下事嘗憤廣明之後中土日蹙值累朝多事尚未克復慨然有包舉天下之志而皆嘗計事者多不諭其旨唯朴神氣勁峻性剛決有斷凡所謀畫動愜上意繇是急於登用尋拜左散騎嘗侍端明殿學士知府如故

冊府元龜

冊府元龜 帝王部



